



Taulogologo

O LE IPU O LE FA'ASO'OINA

FEPUARI 2019

A tatou tomanatunatu i le amataga o le Eukalisitia mai le 'Tausama'aga Mulimuli' na tago ai Iesu 'i le falaoa ma le uaina' (o lo'o manino mai ai mea 'ese'ese nei e lua) ae o se fa'atusatusa atu iā tatou ulua'i tusitusiga na maitauina ai sa ia tago 'i le ipu.' Ma o lenā ipu sa tumu i le uaina lea na ta'ua i fa'aupuga na maua mai i Tala'aga a Sinopi. *"E moni ou te fai atu iā te outou, ou te lē toe inu lava i le fua o le vine, se'ia o'o i lea lava aso 'ou te inu ai le uaina fou i le malō o le Atua."* Ae o le ulua'i fa'aogaina 'o le ipu' (ona fa'apea lea ona fa'ataunu'uina lenā inuga) ina ua fa'atusatusa ma le fa'amamafaina mulimuli mai o mea sa i totonu o le ipu (le mea sa inuina), e i ai sona tāua?

O le molimau mautinoa 'o le ipu' e tāua i le manatu a le Ekalesia ona ina ua tago Iesu i le ipu, ma fa'amanuia i le Tamā, na avatu e Iesu iā i latou o lo'o fa'apotopoto i le laulau ina ia 'feinu mai ai.' E le fa'apea o latou uma e inu uaina – po'o nisi suavai – se mea sa mafai ona latou faia mai iā latou lava ipu, pe manatu fo'i e feinu i le uaina na sau mai se fagu e tasi, ae na latou fa'asolosolo le ipu mai le tasi i le tasi *ma ta'ito'atasi ma inu mai lenā lava ipu e tasi.* A tatou maitauina lea, ona mafai lea ona tatou iloaina 'le ipu' sa tāua iā i latou fa'apea le mea sa i ai i totonu. O le mata'itū o ia ulua'i manatu o le fa'aapefea ona latou feinuina, ae lē o le a le mea na inuina.

Na o le Tasi le Ipu?

O le mea muamua, e ao ona tatou maitauina le lē masani a'i o lea faiga o le feinu mai se ipu e tasi. E leai se uiga tutusa fa'apea i isi aganu'u fa'a – Iutaia e pei o mea'ai o le Sapati po'o le Paseka, e leai se tāua o ni tu ma ni āga fa'apea a isi ituaiga i Iutaia lava po'o ni fa'amaumauga e uiga i ni faiga fa'apea i ni tusitusiga Iutaia na muamua atu iā Iesu po'o tua mai. O le avea o le fa'asoaina o se ipu i tu ma āga a nisi i le laulau ua fa'asino tonu lea iā i latou na mulimuli iā Iesu. O le inu o se vaega o faiga'ai a so'o se aganu'u lava, ae o le manatu o le fepasi'ai o se ipu e tasi e lē masani ai. O le fa'asoa i se suavai e tasi e le afaina e pei o se tipoti koko – ae o le masani a'i ona tasi se ipu, e leai lea

O le gaioiga o le fa'asoa i le ipu e tasi o le autū ua va'aia i molimau mai le seneturi lua ma le tolu i le tāua o le tu'u fa'atasia o ekalesia.

O le a le tāua o lea faiga ma sa fa'aapefea ona mala-malamaina? I le fa'atusatusa atu i le fa'asoaina o le falaoa, o se vaega tāua tele o le fa'asoaina o le ipu o le tu'u fa'atasia ma le maopopoga lea o le nu'u, le tasi ma le isi ma le Ali'i toetū. Afai o le fa'asoaina o le falaoa e fa'aali

ai le mafana o latou o lo'o nonofo fa'atamilo i le laulau, o le tulaga o le mafanafana i le fa'asoaina o le ipu ua sili atu. O le inu mai le ipu e tasi o se 'sauniga fa'atua'oi' ua fa'amatala ai le taumauga i le fa'aso'o'ina, ona o lea o se mataupu matuiā tele ma o le a latou tali atu mo lo latou vala'auina ma le filifiliga e inu mai i lenā ipu (Korinito 11: 27 – 8). Ona o se gaioiga e folafola atu ai le taumauga i le fa'aso'o'ina ma le te'ena o atua pepelo, o le 'au atu i le toto – ola o Keriso (10: 16) ua avea ai i latou ma vaega o le feagaiaiga fou na fa'amausalī i le toto o Keriso (11: 25)

Mo Paulo, o le fa'aso'o'ina o lona uiga o le avea ma vaega o le feagaiaiga fou ma le fa'asoa ai i le ola ua ofoina mai e Keriso; ma o le avea o le ipu e tasi – e lē o se gaioiga e fa'atalelē i ai – ae o le taliaina o lenā fa'aso'o'ina ma avea le toto ola o Keriso i totonu o tatou tino ta'itasi. Ua tatou masani pe a mafaufau atu i le fa'atinoina o papatisoga, o se sauniga fa'atua'oi' a le nu'u fou, ae mo Paulo i le taimi na ulua'i tusi ai i Korinito, o le fa'asoaina o le ipu o se sauniga fa'atua'oi' fo'i - ma talu ai lava sa faia pea i vaiaso ta'itasi o se folafolaga fa'aauau o le fa'anaunauga e fa'aauau pea i le Ala. O le o fa'atasi o le inuina o le ipu ma le papatisoga sa i le mafaufau o Paulo a o ia tusi e uiga i lenā tausama'aga a le Ekalesia ua fa'amausalī i sana fa'aupuga e uiga i le Agaga o lo'o i ai i lenā Ekalesia: "Auā fo'i o le Agaga e to'atasi na papatisoina ai i tatou uma i le tino e tasi, po o Iutaia, po o Eleni, po o pologa, po o sa'oloto; ma ua fa'ainumia i tatou uma i le Agaga e to'atasi (Korinito 12: 13). E pei ona tu'u fa'atasia e le Agaga i le papatisoga, o le Agaga lea ua latou feinuina fa'atasi. O lona uiga afai ua latou manana'o e avea ma tagata fou, e ao ona latou feinu mai i le ipu e tasi ma talia mea uma.

O le sini autū o le feso'ota'iga i le ipu ma le fa'aso'o'ina ua taolaola i le fa'aso'o'ina o Iesu lava ia i le Tamā lea ua tu'uina mai i lona loto malie e inu i lenā ipu na ofoina mai e le Tamā. I evagelia sinopi ma Ioane, o le puapuagā o Lē na fa'au'uina e le Tamā, e tatau ona fa'ataunu'u ma ua tu'uina mai i tulaga o lana 'ipu' ma le loto malie o Iesu e inu mai ai. Mai iā Mareko 14: 36, sau ai ma Mataio 26: 39 ma Luka 22: 42, ua aumai o se vaega o lana tatalo i le togala'au: "Ava, lo'u Tamā e, e te mafaia e 'oe mea uma lava; ia e ave'eseina lenei ipu iā te a'u, ae 'aua le faia o lo'u loto, a o lou finagalo." Ona o lona usita'i na ia talia ai le mea ua aga'i i ai lona fa'aso'o'ina. Mai iā Ioane 18: 11 ua tu'uina mai Iesu ua faia le finagalo o le Tamā e aunoa ma se fesili po'o ni fa'aailoga o le fefe fa'atagata, ae ua inu mai 'le ipu' ua tu'uina atu e le Tamā iā te ia.

O LE IPU O LE FA'ASO'OINA

OLE AVA A SAMOA O SE VALO'AGA

Fai mai se tusitusiga mai iā Katinale Pio Taofinu'u, O le 'Ava' o se valo'aga. O le aganu'u a Samoa, o lana lotu lea mai le vavau. O lona fa'avae lea mai le Atua e tausi ma fa'agalueaina ai lona *Fealofani*, lona *filemu* ma lona *Tasi*. O le aganu'u a Samoa o se valo'aga o le lotu a Keriso, o le aganu'u Fa'akerisiano lea. O vaega ta'itasi o le Sauniga o le 'Ava', o se perofetaga po'o se valo'aga e fa'atepa ai i tatou i lo tatou Olaga Kerisiano a o tatou i ai i lenei lalolagi. O le tu'ua (failauga) o le nu'u, i lona logologoina o le saofa'iga mo le feiloa'iga i le 'ava, e mafai ona fa'atusa i le Atua le Tamā i lona logoina o le Agaga Pa'ia ma lana vala'au i lona Alo e To'atasi, ia amata le usuga o le feiloa'iga i le galuega fa'aola a Keriso e feiloa'i ai le lagi ma le lalolagi.

O le 'Ava' e mafai ona fa'atusa ia Iesu lo tatou Fa'aola, o Ia o le 'Ava' Fa'alelagi na feiloa'i ma feso'ota'i ai le Atua ma le tagata i le āna i Petele'ema. (*Katinale Pio Taofinu'u - 'O le Ava o se Perofetaga. 8 Setema 1973*)

O le fa'atutumumuga o le fesilafaiga, o le inu o tagata uma i le 'ava mai le 'IPU' e tasi. *O le ipu o le Feilo-*

a'iga, o le ipu o le Fa'akerisiano, o le ipu o le fealofani, o le ipu o le fa'auō, o le ipu o le feso'ota'iga, o le ipu o le fa'aleleiga, o le ipu o le Fa'aso'oina, o le ipu o le TASI'AGA – ua

“Tasi Tatou ia Keriso”

Ia Fa'amanuia mai le Atua i la tatou faigamalaga o lenei Tausaga Fou ua Amata.

Salā M. Teofilo

FAITAU LE TUSI PA'IA

2

O le Evagelia a Luka

O le Evagelia a Luka ma Galuega o tusitusiga e lua ua fa'amatalaina se tala e tasi, o le fa'asalalauina o le Tala Lelei. O nei tusi e lua o lo'o tu'utō i se faiga fa'asauniga ato'atoa i se “fa'auō a le Atua” ma le fa'atomuaga o le kratistos, “afioga”. Pau tagata e i ai suafa lea i le tala o Filiki ma Feso, o Kovana o Kaisareia. Ua tatou iloina sa fa'atasi Luka ma Paulo i Kaisareia mo le lua tausaga, ma su'esu'e Filiki e uiga i le fa'atuatua (Galuega 24: 26 – 7) – pe sa amata ona tusitusi Luka mo lona lelei? Afai o lea, atonu sa alu i itu i Nasareta e feiloa'i iā Maria ma fa'alogologo i tala matagofie o le Fa'aaliga, le Asiasiga ma le Fanau mai o lo Tatou Ali'i, sa ia tusia i le faiga e pei o le Feagaiga Tuai. Mo Luka o se tasi o tusi tala o le Feagaiga Fou e fai fa'aleleia ana fuafuaga: sa ia tusia ma le fa'aeteete ma sa filifili lelei le faiga ina ia talafeagai ma mea na tutupu. Sa a'oa'oina lelei i Eleni, sa masani fo'i ma le Feagaiga Tuai. Fai mai nisi o ia o se Kalilaia, o se tasi o to'agafitu ma le lua na fa'apa'iaina e Iesu (Luka 10), masalo fo'i o se tasi o latou sa feiloa'i atu i le Ali'i i Emau, fai mai isi e sau mai Troy, o se Eleni i lona fanau mai. Sa fa'atasi atu ma Paulo ina ua pasia Troy, ona fa'atoā amata ai loa ona fa'apea mai o “matou” (Galuega 16: 10).

O le vaega tele o le Evagelia o le faigamalaga, a o malaga atu le Ali'i mai Kalilaia e aga'i atu i Ierusalem. Na tu'u fa'atasia lelei e Luka ni tusitusiga mai ai, e pei ona ia fai mai ai, “e to'atele ua taumafai ona tusi fa'asolo le tala” (Luka 1: 1). Tala o le fa'amalologa, ma o le fa'ata'oto aupito sili le ta'uta'ua, ua fesoasoani iā i tatou i le malamalama o Iesu ma lana galuega. I le ala ua tatou feiloa'i atu ai i Aposetolo ma isi so'o, ma na va'aia i latou ua auina atu muamua e sauniuni mo le taunu'u o le Ali'i. O fafine mai Kalilaia ua 'au atu i le fa'apotopotoga ma ua fesoasoani

ma tausi iā i latou.

Ua fa'aulufale ma talia lo tatou Ali'i i le itū i Matū, ae te'ea i Saute, ae lē fa'atuatua e Samaria i le va lea. O i Ierusalem, fa'atasi ai ma isi tagata i saute fa'asoisā, na valo'ia ai e Iesu fa'aletonu o le a sau, le fa'aleagaina o le A'ai ma le Malumalu, o le fa'ata'oto lea o i'uga o le lalolagi. O mea uma nei o lo'o tusia i se faiga e tutusa ma Mataio, ae ua polesi fa'alelei. O nisi o laina ua tauau lava o le upu i le upu ua tutusa e pei o Mareko po'o Mataio, ma ua tele vaitusi ua ma'umau i le tau mafaufau po'o ai na kopi mai iā ai: o le moni lava i se aganu'u sa fa'atāua tele le a'oa'oina tauloto, o tala sa manino lava na fa'amatala ma toe fa'amatala i upu lava e tasi e le 'au tala'i o le Tala Lelei. A o puna'oa a Luka o lo'o a'afia mai ai ma molimau e le'i iloina e Mataio ma Mareko, fa'apea fa'amatalaga sa ia mauaina mai iā Maria.

Ua na o Luka lava ua aumaia le tala o le Pasio i se fa'amtalaga agamalū, le toe fa'apipi'iina o le taliga o Peteru na tipi 'ese, le fa'amagaloina o le gaoi ua salamō. Ma na o Luka fo'i ua tatou fa'alogi ai i le 'Auala i Emau, ma le Si'itiaga o le Ali'i i le Lagi. Ona o nei vaega uma ua lauiloa ai o ia o se tusi Evagelia e malū, fa'atasi ai ma se ata ua fa'aalia ai lo tatou Ali'i e 'aulelei toe fa'atosina.

A'OA'OGA A MAREKO

O Iesu e aumaia le ola – (Mareko 3: 1 – 6)

Atonu e fa'asoosoina i tatou o lenei fa'amalologa ua na o se vavega la'ititi. Ona o le ali'i ma lē ona le lima ua mamae e mafai ona savali aga'i atu i le sunoka. Ua lē pei o le pipili, na avatu e ana uō iā Iesu i luga o se fata ma tu'u ifo i lalo e ala mai i le tauluga (Mk. 2: 1 – 12). E leai, o le tagata ma le lima mamae na savali i le sunoka le mea na feiloa'i atu ai iā Iesu. Pe sa fa'amoemoe e fa'amaloloina o ia? Tatou te le mailoa lea. Pau le mea ua tatou iloa sa 'au ai i le sauniga, ma sa fa'apea fo'i Iesu.

O le tagata pipili ua le pei o le isi tagata na fa'amaloloina e Iesu, le lepela (Mk. 1: 40 – 45). O le lepela sa lē a'afia o ia i mea masani a le nu'u ma sa lē mafai ona 'au atu i le sauniga i le sunoka. Sa ia feiloa'i atu iā Iesu ona sa ia sa'ili atu iā te ia ma solia ai le tulafono i le alu sa'o iā Iesu, ina ia mafai ai ona fa'apa'ū i ona vae ma talosaga atu ina ia fa'amaloloina.

I se isi manatu, o le tagata e mamae lona lima e foliga mai o se mea fa'atauva'a, e le o se vavega maoa'e. Ae na fa'amatala ma ia va'aiaga fa'apitoa e uiga 'ese iā Iesu. Sa ia fesili mai: "Pe sa 'ea le agalelei i le sapati, po o le agaleaga; o le fa'aola, po o le fasioti?" Sa mana'o Iesu e avatu le ola ma faia loa ae leai sona tau. Sa le fa'atali mo nai itulā se'i mae'a le sapati ona fa'amalolo ai lea o lenei tagata. O le agalelei le fa'atua'oia a Iesu sa feagai ma uiga mata'utia mai ia latou sa tete'e iā te ia. Sa amata loa ona fuafua e fa'aleagaina o ia.

Sa mana'o Iesu e avatu le ola po'o le a lava lona tau. Na o'o lava i lona ia lava ola. O 'oe o lo matou ola, Iesu e, alofa mai ia i matou.

Feiloa'i atu ia Iesu (Mareko 5: 21 – 43)

O le faitauga lenei mai ia Mareko o lo'o fa'amatala maia le tala i ni tama'ita'i se to'alua sa feiloa'i atu ia Iesu i le aso lava e tasi. O le tasi e matua a o le isi e sefululua tausaga. Sa toe fa'aolaina e Iesu i la'ua nei mai le oti.

Ona sa puapuagatia le fafine matua i le ma'i o le puna toto, o ia o se fafine e malosi i le fa'alelotu ma ua 'oti' i le fa'asosaiete. O lana aganu'u ma lana talitonuga ua tua'ia o ia e lē mamā. Sa le mafai ona 'au atu i mea fai a lona nu'u fa'apea le lotu. Sa fa'ate'aina o ia i le sefululua tausaga mai nei mea masani o le olaga.

O le teneititi, o le afaiete laititi a Iairo, e sefululua tausaga ma na oti lava o ia. Sa ma'i, ma na fa'ateteleina le ma'i ma malui ai.

O le tala i nei tama'itai e toalua, le tasi e matua a o le isi e la'ititi, na suia e fa'avavau ona o se aso sa feiloa'ia tu ai iā Iesu.

Na ala mai i lona mana ma lona alofa sa ia ave'ese maia i la'ua mai tulaga sa i ai ma avatu i ai le ola fou. Lua afe tausaga mulimuli mai ai, o la lava e i ai 'iina' mo tatou, e le o oti pe fa'agaloina fo'i ae ola i le mamalu, ona o le aso lava e tasi na la feiloa'i atu ai iā Iesu.

E 'ese'ese 'auala na la feiloa'i atu iā Iesu. O le fafine matua na feiloa'i ia Iesu ina ua fa'alogi i tala e iuga iā Iesu ma na savali e s'ili atu i ai. Na mana'omia lava lana fesoasoani. O le sefululua tausaga na feiloa'i atu iā Iesu ina ua asiasi atu Iesu i lona aiga ma maua atu ua oti o ia i luga o le moega. Tatou te lē mailoa po'o le a le mea na tupu mulimuli mai ai i nei mafine e to'alua.

Mo tatou e lē afaina pe fa'apefea ona tatou feiloa'ia atu iā Iesu. Atonu tatou te feiloa'i i ai ona i o tatou tigā ma mafatiaga ua tatou sa'ili ai mo ia. Pe tatou te feiloa'i atu i ai pe sau fa'afuase'i. O le mea sili le tāua o le feiloa'i atu i ai e pei o tatou lava ma o tatou puapuagatia ma fa'anaunaga. E ala atu i le feiloa'i iā Iesu o le a auina mai ai i tatou mai le oti i se ola fou. Mo tatou ma tagata uma lava, o Iesu e aumaia tatou mai mea uma e afafina ai i tatou ma fa'asoa ma i tatou le anoanoa'i o le ola fou, le

atoaga o le ola fou i le taimi nei ma le fa'avavau.

Iloaina lelei o Iesu (Mareko 6: 1 – 6)

O se tala ofoofogia o lo'o fa'amatalaina i le vaega lea o le Evagelia a Mareko. I le isi itū, o tagata o Nasareta ua maitauina le atamai ua sau mai iā Iesu pe a tala'i i le sunoka. Ua latou maitauina fo'i le matagofie o galuega mamana na faia e Iesu. Ae o le isi fo'i itū, ua le talitonu iā te ia. Ua lē tatala atu i latou e fa'alogi i le fe'au fa'aperofeta ma o atu iā te ia i le fa'atuatua. O le a le mea ua fa'aletonu?

latou iloina lelei lava o ia. O le atali'i o le kamuta ma le fau fale. Latou te iloina fo'i lona tinā o Maria ma ona aiga. I le tele o tausaga ua masani lelei iā Iesu. O le latou fa'afitauli lenā ma e mafai fo'i ona avea ma o tatou fa'afitauli.

Ua tatou iloa lelei lava Iesu, po'o ua tatou manatu tatou te iloina lelei o ia. Ua tatou iloina lana fe'au ma mea na ia faia. Ua tatou iloina lona tinā ma le tele o tagata e lalata le mafutaga ma ia, amata mai i le to'asefululua, Maria Matalena, ma Sagato Paulo. Ae e mafai ona avea le lē lava o le masani iā Iesu o le a lē taliaina ai o ia ma lana fe'au o le ola e fa'atumulua ai o tatou loto, o tatou mafaufau ma o tatou ola. Na ona tatou tatalo o lenā olioli e sau mai iā Iesu lava ia, o le a toe fanau mai i lea aso ma lea aso o o tatou olaga.

O Misitelio ma Iesu i Aso Uma (Mareko 6: 45 – 52)

Ua sau le po ma o se matagi ua agi malosi mai a o savali Iesu i luga o le vai aga'i atu i so'o. Ua latou ofo ma le mata'u i le mea ua latou va'aia i le pogisā. Ae ua fai atu Iesu: "O a'u lenei. 'Aua tou te matata'u." I se isi va'aiga ua lelei i le manatu masani. 'O a'u lenei, le Iesu tou iloina lelei ma sa outou feoa'i fa'atasi i Kalilaia.' Ae o le tala na faia e Iesu, 'ego eimi', e mafai fo'i ona fa'aliliuina 'O a'u'. Ua toe ave i tatou i tua i le feiloa'iga a Mose ma le Atua i le vao filifili mumū na fai mai ai le Atua: 'O A'u'. Ina ua fai mai Iesu, 'O a'u lenei, o lo'o aumai fo'i o ia i se 'auala mamana toe matagofie tele. O lo'o i ai se uiga loloto fa'apea, se uiga ua fa'aali mai lugā, 'o a'u lenei'.

O le fa'augaina o fa'aupuga ua tatou malamalama ai i auala ua feiloa'i mai ai le Atua iā i tatou ma talanoa mai iā i tatou. – e le gata o le Atua i aso uma ae o le Atua e matagofie tele. Na fai mai le Atua: O a'u lenei, le Atua o lo'o ola ai outou, ma gai ai i aso ta'itasi' (Galuega 17: 28). Ae na fai mai fo'i le Atua: O a'u o le Atua misitelio na sau iā te outou i le matagofie, e o'o lava i taimi o le mata'u'.

O Iesu fo'i ia o lenā: o la tatou Atua i aso ta'itasi ma le Atua matagofie ma le misitelio. O ia na fai mai: 'o a'u lenei'. Ae o ia fo'i na fai mai, e lē ala mai ise afi ta'alili, ae i le pogisa: 'O a'u lenei.

TALA'IGA A IOANE

Fa'avacina o le Lotu i totonu o le nu'u (Ioane 4: 46 – 54)

A fa'atusatusa atu i nisi o tala ua aumai e le Evagelia a Ioane e uiga i tagata na feiloa'i atu ia Iesu, o le tala lenei o se tagata aloa'ia a le malo e pu'upu'u tele. Ae ui i lea, e mau 'oa i le fa'aleagaga, e pei o nisi o tala 'u'umi. Fa'ata'ita'iga o le fa'aigoaina o lenei tagata mau tofi aloa'ia i le tala.

Sa tamo'e atu e feiloa'i atu iā Iesu o ia o se ali'i mautofi aloa'ia e tautua atu i se tasi o ta'ita'i o le nu'u. O ia o se tagata aloa'ia o le fa'amasinoga; o lona uiga o lana matafai-oi i le sosaiete po'o se isi fa'aupuga o ona foliga va'aia i luma o tagata. Ina ua fai atu Iesu ia te ia, 'aluia oe, ua ola lou atali'i,' na tatou faitau: 'ua talitonu le tagata i le upu na fetalai atu ai Iesu, ona alu ai lea o ia.' I le ulua'i Eleni, 'o le tagata' *'ho anthrōpos* (tagata ola)', i le loto o lona tagata ola, sa fa'alogi i le mea na fai atu ai Iesu iā te ia, tu'u atu lana fa'atuatua i lana upu, ma alu i lona aiga.

Ona ia maua atu lea ua toe ola lona atali'i, ma fa'aigoaina ai o ia 'o le tamā'. Na i'u le tala ina ua fa'asoa e le tamā le fa'atuatua iā Iesu ma lona aiga atoa. O ia ma lona 'au aiga ua avea ma tagata fa'atuatua. O le feiloa'i atu iā Iesu ma fa'atuatua i upu a Iesu sa le ave'esea ai se mea mai lea tamā. O lona atali'i ua fa'amaloloina ma lona aiga atoa ua fa'asoa i le fa'atuatua iā Iesu.

O le fa'atuatua na tapasaina ai le olaga atoa o lenei tamā. Ua le na o se ali'i o le malo; a ua avea nei o ia ma se tamā a se atali'i maloloina lelei, le tamā o se 'au aiga fa'atuatua, ma o se fa'auluuluga, pe a manatu i ai o se lotu i totonu o le nu'u.

Mo tatou, e fa'atuatua, o le feloa'iga ma le talitonu iā Iesu e le ave'esea ai se mea, ae o le a fa'aoloina ai i so'o se 'auala.

Sau mai le Atua toe fa'afo'i i le Atua (Ioane 13: 3)

'Sa silafia lelei e Iesu o ia na sau mai le Atua ma e toe fo'i i le Atua.' O na upu ua maua mai ai se ta'ofa'iga atoa o le olaga o Iesu. Na sau mai le Atua i le tatou lalolagi nei, ona toe tu'u lea o le lalolagi nei ma toe fo'i i le Atua. O le olaga atoa o Iesu i lona amataga ua fa'upu fa'apenā, o mea na tupu i le va o lona sau mai le Atua ma lona toe fo'i i le Atua.

Ioe, o mea na tutupu i le tala fa'asolopito o Iesu i le lalolagi nei e tāua ma e uiga 'ese lava. Ae na tutupu i le va o lona sau mai le Atua ma lona toe fo'i i le Atua. O lona sau mai le Atua ma lona toe fo'i i le Atua ua maua mai ai se fa'aupuga matagofie o le uiga o le olaga fa'atagata o Iesu.

E tatau fo'i iā i tatou ona va'ai i o tatou olaga i lenā auala – o le sau mai le Atua ona toe alu atu fo'i lea i le Atua, lo tatou tupu'aga matuā alofa tele ma se taunu'uga matuā matagofie tele.

O le manumalō o Keriso (Ioane 16: 33)

O upu mulimuli a Iesu i le faitauga mai le Evagelia a Ioane o lo'o i ai le fa'aupuga, 'aua le fefe. Ua ou manumalō i le lalolagi'. Lua afe tausaga mulimuli mai ai, ua tatou va'aia fa'aailoga, e o'o lava i le tele o fa'aailoga, o le manumalō i totonu o le lalolagi ma i le lalolagi. Ae ua tatou va'aia fo'i ma fa'aailoga e leai se fa'amatalaga tele o lona manumalō. E mana'omia le fa'atuatua ma le loto tele e fai mai ai: 'ioe, ua e sopo'ia le lalolagi. Na manumalō Keriso, na nofo tupu Keriso, na pule Keriso (*Christus vincit, Christus regnat, Christus imperat*).

O le manumalō a Keriso e 'a'afia ai le taunu'uga mulimuli a tagata uma ma e fa'aauau o se tauiviga tāua tele. Ua vala'auina i tatou ina ia ola ai lenā manumalō, ma tauave i luma lenā manumalō ona o tagata uma.

O Iesu ma Maria Matalena (Ioane 20: 11 – 18)

I le vaitau o le taua lona lua a le lalolagi, ina ua tu'iina le 'a'ai o Lonatona e pomu, o le tele o mea totino tāua sa i le fale mata'aga na ave'ese ma teuina i se nofoaga saogalemū i le togavao. Sa tapena uma 'ese ata tasi ae tasi lava le ata e to'atele tagata sa manana'o e tu'u ai pea i le taimi o le taua se'ia taunu'u se filemū. O le galuega lenā a Titian o lo'o fa'amatala mai ai le Keriso toetū mai le oti, e i autafa o lona tu'ugamau, ma o lo'o fa'aailoa atu iā Maria Matalena.

Sa 'au atu Maria Matalena ma le loto toa i le fa'akoluseina na i'u ai le ola o Iesu. Sa tu ai o ia ma le fa'atuatua i vae o le koluse a o maliu o ia ma le tigā. Sa ia va'ai i lona tino ua aumai i lalo mai le koluse ma avatu i le tu'ugamau fou. Ona o'o lea i le taeao o le aso Sa o le Eseta, sa ia malaga mai le auala o Ierusalem e asiasi i le tu'ugamau a Iesu. I lona maofa ina ua tau atu ua matala le tu'ugamau ma ua leai se tino i totonu, ona, i le taimi o lona fiasia tele, sa feiloa'i atu i ai ua ola i le mamalu. Ua le mafai e le oti ona taofia o ia. Ua toe fo'i mai, ua susulu mai ma suia i tua atu o le tu'ugamau. Sa iloina lelei lava e Maria Matalena o ia ma va'ava'ai atu i lona maliu tigā i le koluse. Ma o lea ua toe fa'atasi ma ia, atoatoa ma toe ola mai i se taeao matagofie tele e le uma.

Ua ofoina mai e Maria Matalena se fa'ata'ita'iga uiga 'ese lava i mataupu fa'avae o tatou uiga fa'aletagata ua fa'atonu-tonuina e le alofa a isi tagata mo tatou ma lo tatou alofa atu i isi. O lenei alofa āloa ua fausia ai ma fa'amautu ai e fa'avavau lona tagata. O le ata lea na tusia a Titian o le feiloa'iga a Maria Matalena ma le susulu laulelei o Keriso ua manavaina maia se alofa āloa, o le alofa o Iesu mo Maria Matalena ma le alofa o Maria Matalena mo Iesu. O lenei tasi ata ta'uta'ua ua ia pu'epu'e maia se taimi o le feiloa'iga ua fa'amatala ai po'o ai Maria Matalena ma fa'apefea ona avea i tatou ma ni so'o agalelei ma le taumauga o le Ali'i fa'akoluseina ma le toetū.

I le taua lona lua a le lalolagi, na sa'o lelei tagata Lonetona. I taimi o osofaiga ma puapuaga sa latou o'o i ai, sa manana'o e va'ai i le ata sa tusia o Iesu sa toetū mai le oti ma le mamalu ma na fa'aali iā Maria Matalena. O Maria Matalena o se molimau matagofie a Iesu, o le ua ola i totonu o tatou ma mo tatou. Na ona tatou tatalo: Maria Matalena, fesoasoani iā i matou e sa'ili le Iesu soifua ma ia a'afia i matou i le loloto o lona alofa o le a fa'atonutonu ai i matou e fa'avavau.

O le Vitua mai Naina

O le vaega mauluga o le tala a Iesu i le toe fa'aolaina mai o se ali'i talavou (Luka 7: 11 – 17), na fai mai Luka ua 'mutimuti alofa Iesu i le fafine ua oti lana tama. E le'i feiloa'i muamua Iesu i lenei fafine, na te le iloaina fo'i lana tama. O le tala la e pu'upu'u atu i lo le tala i le toe fa'atuina mai o Lasalo o Petania (Ioane 11: 1 – 44). O Lasalo o se uō mamae a Iesu, ma sa iloaina lelei fo'i e Iesu ona tuafafine e to'alua na tu'ua e Lasalo ina ua maluu. O le tala iā Lasalo o se mafutaga mafana i le va o Iesu ma le aiga mai Petania. A o i Naina, e le'i iloaina e Iesu le fafine vitua po'o lana tama fo'i.

O le vitua lava ia e le'i sa'ili se fesoasoani mai iā Iesu e faia se mea mo ia, po'o lana tama na maluu. I lona loto mafatia tele sa le'i alu ai ma sa'ili mo Iesu. Ae masalo fo'i e le'i fa'alogoa lava i lenei tagata o Iesu.

Ae e le'i fuafuaina le fetui atu o Iesu i le fafine vitua a o aga'i atu i le fanua tanu. Ua mutimutivale lona alofa i le fafine. O le tele o lona alofa na toe fa'aola mai ai le taule'ale'a, ma na toe fa'afo'i atu e Iesu o ia i lona tinā.

I le seneturi luasefulu o se fai Filosofia Falani e igoa ia Gabriel Marcel e masani ona fai ni ana tatusiga e uiga i sini autū o le ola a'i ole tagata, e pei o le alofa. Fai mai Marcel, o le faiaitu i se tagata 'ou te alofa iā 'oe' o lona uiga o lo'o e fai atu i lenā tagata 'E te le oti.' Tatou te fai atu i o tatou aiga pele ma uō 'Ou te alofa iā outou.' Ae pagā lea e maliliu lava. E i ai pea lo tatou alofa mo latou, ae foliga mai e leai se malosi'aga i le feagai atu lea ma le oti. O tatou tinā, ma o tatou tamā ma isi tagata tatou te mafuta pea i ai e maliliu, ae pau le mea tatou te mafaia o le tu'u o latou i le pusa oti ma tanu i latou. A tatou feagai atu i le oti, o la tatou alofa e leai se malosi'aga.

Ae o Iesu e 'ese. Sa mutimuti alofa i le fafine vitua, ua na o ia i lenei lalolagi. Ua leai se to'alua, a o lenei ua leai fo'i ma lana tama e to'atasi. Na momomo lona loto mo ia, ma o ana upu malosi na suia ai le tulaga atoa. "Le taule'alea e, ou te fai atu iā oe, inā tula'i ia." O le alofa a Iesu e uiga 'ese lona malosi. Ua sili atu e o'o lava i le malosi'aga a le oti.

I lona alofa mutimutivale ua 'a'apa atu ai iā i tatou uma lava ma fai mai: 'Ou te alofa iā oe.' Ia i ai lona alofa naunautā'i mo tatou ta'ito'atasi. O lona alofa, lona loto fuatiaifo ma le alofa mutimutivale mo tatou, o lona uiga o tatou fo'i ua mafai ona fa'asoa i lona manumalō i le oti.

Mo le tele o seneturi sa masani i tagata ona faia ni taulima ma ni asoa sa tusia ai upu Latina: *amor vincit omnia* (o le alofa e manumalō i mea uma lava). O lenei fa'aupuga ua talafeagai mo Iesu lava ia: o lona alofa e *manumalō i mea uma lava*. Mo le vitua o Naina ma i tatou ta'ito'atasi, o le alofa a Iesu e sau ina ia manumalō i mea uma lava, e o'o lava i le oti lava ia. Tatou te mafanafana o le loto alofa a Iesu e le muta lona sau iā i tatou ta'ito'atasi.

'Sa ia fa'aalia le alofa tele'

I nei aso ua salalau se manatu e lē sa'o o le alofa ua na o se fa'alogoga, o se fa'alogoga naunautā'i a se tasi po'o se lagona ua fa'amatu'uina. Ae o lo'o i ai fo'i le 'au fai filosofia ma le 'au fai telosia ua fa'amausalī ma fa'atuputupu le mau o le alofa o se va feagai ai, o se mafutaga mafana i le va o ni tagata. Mo nei fai mafaufauga, o le alofa e tumau pea o se alalua, o le avatu ma le talia, o se feso'ota'iga i ni itū e lua.

O le alofa o le sini autū iā Luka 7: 36 – 50, ma e moni, o se alofa e āloa ma e fa'aali o ia lava i le avatu ma le taliaina. O lenā ituaiga o alofa ua afiafi ai le tala atoa.

Muamua o le fafine agasala ua sau i le fale o Simeona le Farasaio ma fai āga āga'i iā Iesu ma le alofa tele lava. Sa ia mulumulu vae o Iesu i ona loimata, ma solo i lona laulu ma u'u ona vae i le suau'u manogi.

Ona fa'amatala lea e Iesu le tala o se fai oloa ma ni tagata se to'alua na fai aitalafu ai: o le tasi na aitalafu ile 500 tenaria o le isi e 50 tenari. Ina ua le mafai ona totogi nei aitalafu, sa tu'u avanoa lava le fai oloa ma na o'o lava i le fa'amagalo o nei aitalafu. Na alofagia lenei ali'i e la'ua sa aitalafu ma e sili atu le

alofa o le na telē lana aitalafu. Mulimuli mai ai ona vivi'i e Iesu le fafine agasala. Sa faia e Iesu ni upu e uiga iā ia e le'i faia lava muamua i se isi tagata i Evagelia e Fa: 'Ua ia fa'alia le alofa tele.' Sa vala'auina o ia e isi tagata mo ni faiga taumafa, e pei o Simeona le Farasaio, i lona fale na faia ai e le fafine ni āga uiga 'ese o le alofa mo Iesu. O nisi ua tautala lelei mo Iesu ae maise Simona Peteru ina ua ia fa'aalloa Iesu 'o le Keriso, le Alo o le Atua soifua'. O nisi ua manatuaina sa latalata iā Iesu e pei o Mareta ma Maria, ma lo la tuagane o Lasalo – ae le faitaulia ai lona ia lava tinā fa'apea le so'o peleina misitelio i le Evagelia a Ioane. Ae o le mea na faia e le fafine agasala mo Iesu iā Luka 7 na mafua ai ona tautala i se fa'aupuga na te le'i faia muamua i se isi: 'ua ia fa'aalia le alofa tele lava.'

O le mataupu lenei a Luka ua tu'uina mai iā i tatou se tala uiga 'ese i le alofa āloa: o le alofa fa'avalea mo Iesu mo lona agalelei, alofa fa'amagalo mo le fafine. Sa ia fa'aali lona alofa mo lenei fafine i upu sa tautala atu ai i le fafine ma le fa'amagalo o ana agasala. Ae sa ia talia fo'i le alofa mai lea fafine, ma sa fiafia lava e taliaina.

I le tausaga 2006 na tusia ai e Pope Penetito se tusi na fa'aulutalaina 'o le Atua o le Alofa' *Deus Caritas Est* – sa ia fa'aalloa mai ai ala e a'afia ai le alofa i le taliaina ma le avatu. O le alofa e a'afia ai mana'oga e lua ma agalelei, le mana'omia e talia le alofa ma agalelei i le fa'atinoina o le alofa. O le alofa e aofia ai e le gata o le avatu i isi ma faia mea lelei mo latou ae fa'apea fo'i le taliaina mai iā latou.

O le alofa fa'anaunau a Iesu ua mafai ai ona ia faia mea lelei mo le fafine agasala. Sa ia puipui iā te ia i luma o tagata fia amiotonu ua tu'ua'ia Iesu i lona fa'atanaina le fafine e mulumulu ma u'uina ona vae. Sa fa'aogā e Iesu se gagana matagofie tele e vivi'i ai i lea fafine – 'ua ia fa'aalia le alofa tele lava'. Sa fa'amagalo ana agasala, ma auina atu o ia ma le filemū. Sa ia tautala mo ia ma puipui ia te ia. Sa ia tautala atu i ai ma fa'amagalo i ai ma toe vivi'i o ia ona o lona fa'atuatua: o lou fa'atuatua ua lavea'ia oe. Alu i le filemū.

Ae na talia fo'i e Iesu le alofa mai le fafine agasala. Sa mana'o Iesu i lea alofa mai le fafine; sa ia sauniuni e faia so'o se mea mo le fafine ma isi tagata, ona e alofa i tagata uma lava. Ua fuafua Iesu e fa'amagalo i tatou, puipui i tatou na o'o lava i le maluu mo tatou. E mana'o fo'i i o tatou alofa; e mana'omia lo tatou alofa. E mana'o ina ia alofagia o ia e tatou.

Atonu tatou te manana'o e fa'atasi atu ma lea fafine iā tatou tatalo, to'atutuli i vae o Iesu, e o'o lava i le manatu o le a tatou tagi ni loimata o le olioli ma le fa'afetai, manatu fo'i o tatou fo'i o lo'o mulumulu ona vae i o tatou laulu ma fa'atasi atu ma le fafine i le u'uina o ona vae ile sua'u' tūa ua tatou aumaia.

Atonu tatou te le masani ai ona fa'aoga o tatou mafaufauga fa'apea i tatalo. Ae mana'omia e Iesu o tatou alofa, ma o le a olioli tele pe afai tatou te to'atutuli i ona vae fa'atasi ai ma lenā fafine na fa'aali se alofa tele mo ia.



IV. O LE FEAU A MEAOLA TA'ITASI I LE PAËGAMALIE O LE FOAFOAGA

84. O lo tatou finau e fa'apea o tagata ola uma o se fa'atusa o le Atua, ae lē tatau ona tatou lē amanaiaina le mea moni i meaola taitasi e i ai lava o latou mafua'aga. E leai se tasi e sili atu. O le lalolagi atoa o lo'o talanoa e uiga i le alofa o le Atua, o lona alofa lē mafuatiaina mo i tatou. Le laueleele, vai, mauga: o mea uma lava, e pei o se pa'i alofa a le Atua. O le tala fa'asolopito o la tatou fa'auoga ma le Atua e masani lava ona feso'ota'i atu i nofoaga fa'apitoa e faia ai se uiga loloto e patino i le tagata lava ia; tatou te manatua uma nofoaga, ma toe asia ia manatu na faia mea lelei e tele mo i tatou. So'o se tasi na tupu a'e i luga o mauga pe masani foi ona nofo i autafa o le vaipuna e inu ai, po'o le ta'alo i tuāfale o le tuaoi; o le toe foi atu i nei nofoaga o se avanoa lea e toe maua mai ai se mea moni mo i latou lava.

85. Na tusia e le Atua se tusi tautele, "o le tele o ona mata'itusi o mea na foafoaina i le lalolagi." Na sa'o lava le tala a le Epikopo a Kanata e leai se meaola e le o aofia ai i lenei fa'aaliga va'aia a le Atua: "Mai mata'aga lauiloa e o'o atu i se meaola aupito iti, o le natura o se punavai tumau o le maofa ma le ofoofogia. O se fa'aauga o fa'aaliga o lona mana." O Epikopo a Iapani, mo le latou vaega, na latou faia se mafauauga fa'atupu manatu: "Ina ia lagonaina meaola taitoatasi o peseina le vi'iga o lona tupu'aga, o le ola fiafia lea i le alofa ma le fa'amoemoe o le Atua." O lenei fa'autāga loloto o le foafoaga ua mafai ai ona tatou toe lagā i mea taitasi se aoaoga ua finagalo le Atua e tu'uina mai ia i tatou, talu ai "mo e talitonu, ia va'ai toto'a i le foafoaga i le fa'alogo lea i se feau, ia fa'alogo ma le toto'a i se leo e lē amanaia." E mafai ona tatou fa'apea "fa'atasi ai ma le fa'aaliga e pei ona ta'ua, o lo'o i totonu o tusitusiga paia, o lo'o i ai se fa'aaliga fa'alelagi i le susulu o le la ma le paū o le po." O le mataala i lenei fa'aaliga, e a'oa'i ai i tatou i le va'ai i le va ma isi meaola uma: "Ou te fa'ailoa a'u i le fa'amatalaina o le lalolagi; i a'u taumafaiga e sa'ili le uigapaia o le lalolagi, lea ou te su'esu'e lava a'u i ai."

86. O le atulaulau atoa uma, i le matalasi o ona so'otaga, o lo'o fa'aalia mai ai le lēmatineia o 'oa a le Atua. Na ta'ua ma le poto e Sagato Tomasi Akuino e fa'apea o le tele ma le eseese "e sau mai le finagalo o le ulua'i momoimea, o lē na mana'o" i leisi mea e suia le tuaga o le agalelei fa'alelagi e mafai ona fa'aoloina le isi," i le tulaga e o'o i ai e tusa ma le agalelei o le Atua "e le mafai ona talafeagai ona suitulaga e se isi meaola." O le mea lea e tatau ai ona tatou malamalama i le tele o ituaiga o mea i le anoanoa'i o a latou fāiā. Tatou te malamalama atili i le taua ma le uiga o meaola taitasi pe a tatou mafauau loloto i ai i totonu o le aotelega o fuafuaga a le Atua. E pei ona a'oa'o mai e le Katekismo: "E finagalo le Atua ia felagolagoma'i meaola. O le la

ma le masina, o le arasi ma le tama'i fugala'au, o le aeto ma le manulele: le matalasi o latou eseese lē mafaitaulia ma le lē tutusa e ta'u mai ai e leai se meaola e atoatoa ia te ia lava. O meaola ua i ai e fa'alagolago le tasi i le isi, e fa'aatoatoa ai le tasi i le isi, i le auuana o le tasi i le isi."

87. A mafai ona tatou va'ai i le Atua ua atagia i mea uma na faia, o le a si'itia ai o tatou loto e vi'ia le Ali'i mo ana meaola uma ma tapuai ia te ia fa'atasi ma i latou. O lenei lagona e maua se fa'amatalaga matagofie i le pese a Sagato Falanisisi o Asisi:

Ia vi'ia oe, lo'u Ali'i, fa'atasi ma au meaola uma,
 aemaise le Afioga i le Uso o La,
 o ia o le aso ma o ia foi ua aumaia le malamalama ia i matou.

Ma i lona lalelei fa'atasi ai ma lona susulu matagofie tele;
 ma tauaveina se foliga o oe, Le Silisiliese.

Ia vi'ia oe, lo'u Ali'i, e ala i le
 Tuafafine o Masina ma fetu,
 i le lagi na e faia lo latou maninoa, le taua ma le matagofie.

Ia vi'ia oe, lo'u Ali'i, e ala i le Uso o Matagi,
 ma e ala i le 'ea, auāoa ma le to'a, ma ituaiga o tau eseese

ua ala mai ai lau tausiga i au meaola.
 Ia vi'ia oe, lo'u Ali'i, e ala i le Tuafafine o Vai,
 o le aoga tele ma lona lotomauualalo, le taua ma le mamā.

Ia vi'ia oe, lo'u Ali'i, e ala i le Uso o Afi,
 ua ala mai ai lou fa'amalamalamaina o le po,
 ma i lona matagofie ma lona ma'au, lona malosia
 ma le mata'utia."

88. Ua fa'ailoa mai e Epikopo o Brazil o le natura atoa e le gata ina fa'aalia ai le Atua ae o se nofoaga foi o lona fa'atasi mai. O le Agaga o le ola e mau i meaola taitasi ma vala'auina i tatou ina ia tatou mafuta ma ia. O le iloina o lenei fa'atasi mai e ta'ita'ia ai i tatou e atia'e "vituti o le siosiomaga." Ae 'aua nei galo ia i tatou o lo'o i ai se mamao e lē gata i le va o le Atua ma mea o lenei lalolagi, lea e le'o umia lona atoāga. A le'o lea, o le a tatou le faia foi i meaola se mea lelei mo i latou lava, auā o le a tatou le mafai ona fa'ailoa atu lo latou aiā tatau ma le nofoaga sa'o. O le a i'u ai ina tatou fa'amalosia ma le lē tatau i latou i se mea latou te lē mafaia ona tu'uina mai ia i tatou ona o lo latou fa'atauva'a.

-----e faia pea-----Faliliuina Falefou Sio

SAGATO SILILO O IERUSALEMA – EPIKOPO MA LE FOMA'I (315? – 386)

O fa'afitauli i le Ekalesia i aso nei e laiti pe a fa'atusatusa atu i le galulu o a'oa'oga sesē a Arius na te'ea le mamana o Keriso. Sa a'oa'oina Sililo ma na tuputupu a'e o ia i lenei felafolafoa'iga, ma na tu'ua'ia mulimuli ane i le 'au ai i le mau a Arius e Sagato Ierome, ma na mulimuli ane na toe fa'amagaloina i la'ua uma e tagata o o latou lava taimi ma fa'aailoa ai o se Foma'i a le Ekalesia i le 1822.

Na tupu a'e o ia i Ierusalem, ma na a'oa'oina lelei, aemaise mataupu tau le Tusi Pa'ia, ma na fa'au'uina ma ositaulaga e le epikopo a Ierusalem ma avatu i ai le galuega o le sauniuniga o latou e fia papatisoina (vaitau o le Atevetu) ma latou ua fa'atoā papatisoina (vaiaso o le Eseta). O ana a'oa'oga Kapite o lo'o tumau pea o ni fa'ata'ita'iga o sauniga ma telosia a le Ekalesia i le ogatotonu o le seneturi e fa.

O lo'o i ai ni tala fete'ena'i e uiga i tulaga na avea ai o ia ma epikopo a Ierusalem. O lo'o mautinoa sa aloa'ia lona fa'au'uga e epikopo o le setate. Ona o se tasi o latou o se Aria, o Acacius, sa manatu o lana lagolagosua o le a tu'uina atoa i ai. O se fe'ese'esega na tupu mulimuli mai ai i le va o Sililo ma Acacius, le epikopo o le vaega tauvā tulata o Caeserea. Sa amia Sililo e le fonon, ma tua'ia i le fa'asili – au pule ma le fa'atauina o fanua a le Ekalesia e fesoasoani ai i le 'au matitiva. Ae masalo fo'i o se fe'ese'esega i telosia sa a'afia ai. Sa ta'usalaina, tuli 'ese mai Ierusalem, ma na

mulimuli ane na toe fa'asaoina mai, e aunoa ma se fa'atasi atu ma le fesoasoani mai le 'au afa Aria. O le afa o le taimi sa galue ai fa'aepikopo sa fa'aunu'ua ai. O lona toe fo'i mulimuli mai na tau atu i se Ierusalem ua masaesae i le femisa'ai, o a'oa'oga sesē ma le vaeluaina fa'atasi ai ma le tele o soligatulafono. Na o'o lava iā Sagato Kelekolio o Nyssa, sa auina atu e fesoasoani, na toe fo'i ma le fa'anoanoa tele.

O la'ua uma na 'au atu i le Fono Aoao i Constantinople le nofoaga sa toe teuteu ai le Tatalo o le Fa'atuatua o Naisia ma fa'amausalī ai. Fai mai nisi o se faiga o ni togi sala, ae o epikopo o le Fono Aoao sa vivi'i o ia o se siamupini o le una'ia o a'oa'oga maumaututū ua tete'e atu ai i le mau a Aria. Atonu e le'i agalelei tele i le 'au Ria, o Sililo ua faitauna o se tasi o latou ua ta'ua e Athanasius o se "uso ua 'au ai fa'atasi ma i matou, ae 'ese'ese na o le fa'aupuga 'e uiga tutusa la ma le Tamā.'

SAKALAMETA

O le Sauniuniga o le 'Au Katesimo

I le vaitau o seneturi anamua o le malamalama'aga i le fa'atinoga o papatisoga na tuputupu a'e ma toe suia, e ui o le fa'asologa autu sa tumau pea. O le vai mo papatisoga o nisi o taimi sa sa'asa'a i luga o le tagata i lo le fa'atofu o le tagata i le vai, ma o le sauniga na amatalia ona malamalamaina i le tulaga o le fa'amamaina i lo le oti ma le ola fou.

I le seneturi lua o le ta'uta'uina o le fa'atuatua iā Keriso ua lē lava lea mo le papatisoga. O se taimi umi mo le sauniuniga sa mana'omia, ina ia a'oa'o lelei i latou ua sauniuni e iloina le olaga Kerisiano ma fa'amaonia ua latou fa'amoemoeina. O tagata o le fa'apotopotoga ua avea ma lagolagosua i le taimi atoa o nei sauniuniga, ma molimauina lo latou fa'amaoni ma le fa'atuatuaina ae le'i molimoli atua i latou mo le papatisoina.

O le taimi mo le papatisoina ua suia mai le taimi o le liliua o se tagata i so'o se aso Sa ae le'i patipatia le Eukalisitia. Mulimuli ane o se suiga fa'atolu na va'aia ai le fa'aulufaleina o tagata matutua i luma mai o le aso Sa o le Eseta po'o se isi sulufaga fa'apitoa e pei o le Penetekoso.

O latou ua filifilia e fa'aulufale i le Ekalesia e amata se piriota e tele atu lona malosi i sauniuniga ae le'i tu'uina atu i luma o le epikopo fa'atasi ma i latou e tausia e molimau ma fa'amausalī lo latou agava'a. O le matafaioi o le a latou talia ua fa'amatalaina: ona ua tapenaina ma saunia ua mafai ona latou ta'ua i latou o Kerisiano ae o le papatisoga o le a avea ai i latou o sulii o le 'au fa'atuatua. A uma le vaega lea ona fa'atoā mafai lea ona ta'ita'i atu i le sauniga o le papatisoga i le vai ma le fa'au'uina i le suau'u. Ona fa'aulufale mai ai lea i le fa'apotopotoga Kerisiano ma 'au atu ai i le patipatia o le Eukalisitia.

Ua fa'aailoa tau iā i latou o mea ua tuana'i ma agasala ua oti, ua fa'amagaloina i latou e le Atua agaalofoa, ma ua fa'atumulia i latou i le mana o le agaga ina ia ola sa'oloto mai le agasala i le

lumana'i. Sa latou fa'alogi i ai ma sa 'au atu i ai ma isi sa molimauina e moni. Sa latou talitonu i ai, na lagonaina ma sa a'afia ai. O lenei papatisoga o se sakalameta na lelei tele.

Ina ua mae'a le fa'atonutonu a le tupu o Aukusitino i le 313, na muta ai ma le fa'asauaina o Kerisiano. I le 380 na folafola aloa'ia ai o le lotu Kerisiano ua avea ma lotu a le Malo o Roma, ma na amata ai loa ona fai fa'apito le 'au Kerisiano. I le tau o le taliaina, sauniuniga ma a'oa'oga ae le'i papatisoina sa fa'asolosolo ona pupu'u. O le talitonuga sa i ai e fa'apea o le fa'atuatua a se isi e tuputupu pea fa'atasi ma le tuputupu a'e o le nu'u Kerisiano.

O le fa'ateleina o papatisoga o tamaititi pepe na sau ai ma se vala'au ina ia suia sauniga o papatisoga. I le Ekalesia i Sasa'e, o pepe ua fa'atofu atoa ae ua le toe faia, ae ua na ona lōlō i le vai. I sisifo, o le papatisoga i le fa'atofu na suia i le sa'asa'a o le vai i luga o le ulu o le tamaititi a o ta'uta'u e le ta'ita'i upu o le sauniga. Sa manatu e lē o se mea faigatā mo le pepe ma latou o lo'o a'afia ai. Ona toe suia fo'i lea o le sauniga, mai le a'afia ai o le fa'apotopotoga atoa ae ua na o le faife'au, o le tamaititi e papatisoina ma le aiga.

O le fuafuaina fo'i o le sauniga na suia. I le vaitau o seneturi muamua o le sauniga atoa sa mua i le sauniga o le Eseta sa fa'aigoaina o le Aganu'u o le Papatisoga. Aga'i atu i le fa'ai'ui'u o le seneturi e ono i sisifo, o lenei aganu'u maopopo ua amata ona vaevae i aganu'u ma'oti e tolu – papatisoga ile vai, o le fa'apa'iaina ma le fa'au'uina i le suā'u e le epikopo (na mulimuli fa'aigoa o le kofilimasio), ma le 'au atu i le Eukalisitia (mulimuli fa'aigoa o le Ulua'i Komunio). A o fa'asolosolo ona faia le fa'aulufale o tagata matutua, na vavae 'ese le Ulua'i Komunio mai le suniga o le fa'aulufale. Sa i ai le talitonuga tuputupu'a'e o le avatu o le komunio i pepe e lē tal-

afeagai lea ona latou te lē malamalama ile pa'iaga o le mea ua latou talia.

LEADERSHIP & MINISTRY

TAITAI MA TOFIGA

(Fa'aliliuina mai tusitusiga a le alii Faifeau Malōlō o Christopher Lightbound lē sa avea ma Faifeau Pule o le Pule'aga a Shrewsbury) – Fa'aliliuina e Lauano.ILAOA Soso'oga mai le lomiga o Tesema 2018....

(VAEGA 2)

Epikopō Tafaovale

E iai le aso na ma feiloa'i ai ma se Epikopō tafaovale (o le fa'aupuga e 'ave ise faifea'u na te sopo'ia tua'oi o le itumalō e i lalo o lana tausiga).Sa amata ona ma'ua talanoa e uiga i le Ekalesia i onapo nei. Na amata i lo'u sasao iai i lo'u manatu e uiga i le tulaga mamalu ma le pa'ia o tagata lotu ma latou uma e nonofo i nofoa o se malumalu. Ae sa vave ona ia fa'auilavea mai ma taofia ai lo'u naunau,ona ia saunoa mai lea e fa'apea: *'O lo'u iloa iai, e matuā to'atele foi faifeau latou e pa'ia ma mamalu.Ou te lē popole tele i faifea'u e malosi o latou so'otaga fa'aleuō ma tagata lotu. O le fa'afitauli i onapo nei, o le fa'a'esea o faifeau'*

Ou te manatu, e leai se tasi o i maua na iloa, o lo'o ma tafaui talanoa ma 'oto'oto mai fa'ai'uga o le Vatikano II, aemaise o lana 'vala'au mo le pa'iaga o tagata uma'. O le faife'au, e iai lona va'ala'auina fa'apitoa ile pa'iaga, e pei ona maua'a i le Sakalameta o Poloa'iga Paia. Ae i le taimi lava lea e tasi, e tatau ona o tatou manatua ma fa'atāua le finagalo o le Komiti a le Vatikano o loo fa'apea mai, *'o le 'au faatuatua ia ua avea ma itutino o Keriso e ala i lo latou Papatisoga, o Tagata ia o le Atua, ua vaeluaina iai le tofiga fa'a-faife'au, fa'a-perofeta ma uiga tau Tupu o Keriso, i a latou lava faiga,...ma e mafai ona o latou tau'aveina le misiona mo tagata Kerisiano uma i totonu ole Ekalesia ma le lalolagi'.* E leai ni sitiseni fa'ata'ita'i i le Maota o le Alii.

A manatunatu la i lenei tulaga manino o le amana'ia ole 'pa'iaga o tagata tapua'i', ona ou mautinoa lea, o tulaga mamalu ma le pa'iga o 'au'aunaga a tagata lotu, e taolaola e pei o ni fugalau'au manogi i o latou olaga, e auala i le Sakalameta o le Fa'aipoipoga. Ua galo ia te a'u, le tulaga ma'oti o le fa'ai'uga mai le Komiti o le Vatikano, e tusa o le avea o le fa'aipoipoga ma punavai o le pa'iaga o tagata tapua'i.

O le mau a foma'i o le mafaufau, ua latou fa'ailoa mai ai, o le alofa ma le fa'aipoipoga, o auala aupito talafeagai lea i le natura o mea, e atagia ai le avea ma tagata matua. O le kalasia e tupu ma atia'e mai le natura o mea. O tagata uma e auai i sauniga o le Eukalisitia i vaiaso ta'itasi, e maua lona mamalu ma le pa'iaga mai le fa'aipoipoga – mai le alofa ma le faatuatua o ona matua, e auala i le fefa'asoa'I o le alofa i totonu o le fa'aipoipoga, aemaise o le fiafia ma ni popolega i le tausia o le fanau, 'ona o ni faigata ma ni fa'afitauli pe a o'o ina lē ui i le moa o le ala. O mātua o mātua, o se fa'ata'ita'iga sili lea o le mamalu ma le pa'iaga i taimi uma o lenei soifuaga: e mapuna mai ia i latou le poto ma le mafanafana o le alofa mo fanauiti.

Lauga fa'a-faifea'u tausinu'u

O le fesili e ono tulai mai, afai ua ou mautinoa le tulaga mama-

lu ma le pa'iaga o tagata o la'u aulotu, ma le taua o i latou i lo'u ola fa'alēagaga, e tatau ona ai se suiga i le faiga ou te laugaina ai le Talalelei a le Alii? Ioe toe leai. O le muamua, ia 'aua ne'i o'u lauga ma tautala i o'u lava manatu ma ni mea ua ou iloa. O a tatou lauga, e tatau ona mulimuli ma afua mai faitauga o le aso. O ia tulaga sa lē masani ona faia i aso ua mavae i le vaitaimi ao lei faavaeina tulaga ua iai nei le Ekalesia ma ana tapua'iga.

O le tala a se tasi o a'u uo faifea'u mai Aialani e lei leva ona fa'au'uina, ona malaga ane lea i se tasi o palisi i le itumalo Birkenhead. O le afiafi o se Aso Toonai ile tausaga e 1952 na taunuu ai o ia i le palisi lea, ma ua iloga ona vaivai i le mamao o le malaga mai le aai o Dublin na ui mai i Holyhead. Fai mai si faifea'u lea, na taunuu ifo ona fa'afeiloaia lea o ia e le faifea'u pule ma le fa'aupuga: *'Patele, e tatau ona fai sau ipu'i, a uma, ona oulua o lea ma le taule'ale'a lea,mo le aoina mai o foa'i a tagata la e i fafo.E fai le tatou taligasua ole afiafi i le itula e valu.O 'oe foi e te peseina le Misa Sa o le 10.30 ile taeao a taeao, ma e lauga ai i le Poloa'iga e Ono: "Aua e te mulihua (Kaketisimo numera 209).*

O le faia o se fa'afeiloaiga lelei ile aulotu, o se mea ua talafeagai ile amataga o le Misa Sa, e fa'ailoa atu ai le agaga fiafia o le ta'ita'i e tapua'i ma faitaulaga fa'atasi ma i latou. Ole taimi o le lauga, e saogalemu lava lo tatou fa'amoemoe i le Agaga Paia e fa'amanaina ai upu e tautala iai le failauga, ma tatala ina ai loto ma agaga o le aulotu i le a'ano o tusitusiga pa'ia (Epe.4.12 *'Auā, o lo'o ola le afioga a le Atua, o loo matuā galue foi,...*'). O se mitamitaga foi le uuna'ia o le au fa'alologolo ina ia tau'ave lo latou tulaga fa'a-perofeta, ma ia vi'ia lo latou fa'atuatua ma le fa'amaoni.E molimau i latou i le mea moni o le soifuaga i aso faiso'o, ona o i latou o perofeta a le Alii.

Tatou te taumafai foi e faa'malosi'au atu ia i latou, e pei o upu a Paulo: *'O outou o tagata filifilia o le Atua, o ona tagata pa'ia, e alofaina outou e Ia', atoai ai ma tua o lo latou fa'amaoni ia te Ia: 'O lenei, ia o'ofu outou i le alofa mutimutivale, ma le agalelei, ma le agamalū, ma le onosa'i, fa'apei o e ua filifilia e le Atua,...ia fefa'apalepalea'i, ma ia fefa'amagaloa'i outou,...A'o le alofa e lautua lea i nei mea uma,...Ia pule foi le filemu mai ia Keriso i o outou loto,...ia outou saga fa'afetai, a'o outou a'oa'o ma apoapoa'i le tasi i le tasi ile poto uma lava...'* (Kol.3.12-16)

O le fa'ai'uga o le Misa Sa, ou te fa'ailoa atu ai i tagata lotu, lo'u agaga fiafia ma le fa'afetai ina ua matou tapua'i fa'atasi, ma ou fa'afetaia foi lo latou alofa ma le agalelei atoai ma latou talosaga. O le tu ma le aga masani, e tatau lava ona fa'afetaia lē sa talimalō pe a uma se taumafataga matagofie. Ia manatua o le Talisuaga lenei a le Alii.

O fesuia'iga o le olaga fa'a-palisi

E tele fesuia'iga ogaoga i le olaga fa'a-palisi ua ou maitauina talu mai le tausaga e 1960 ma fa'asolo mai ai i luma.O le tutumu o falesai i tapua'iga i le taimi o lo tatou talavou sa nanā ai

tua le mea moni, ole to'atele o tagata na auai i Misa Sa, e mafua ona o se mea ua masani ai, atoa ma ai ma tagata ua fefefe ona o a latou agasala. O onapo nei, o tagata lotu o isi tapua'iga fa'apea ai foi ma le tatou ekalesia, e mafua ona lolotu, ona o lo latou lava mana'o atoa ma lo latou naunau e 'auai i tapua'iga – ua fia a'ai ma fia feinu i mea tau i le Atua: o lona alofa, o lona malamalama, o lana fa'amalologa.

O se tusitusiga 'anoa a Daniel O'Leary, lea e fa'aigoaina **'Ua tuai ona ou alofa i lau afio'**, o lo'o ia au'ili'iliina ai le liliu atu o lona talitonuga i se va'aiga fou i le tulaga mamalu ma le pa'ia o le olaga i totonu o palisi i onapo nei:

'O le mavae o le fia sefulu tausaga o la'u auunaga fa'a-faifeau, na amata ai ona ou lagona, o le mea taua o lo'o fia maua ma fa'ananau iai tagata, e sili atu nai lo fa'amatalaga e fa'ataui i le Ekalesia ma ana a'oa'oga, o le toe fia fa'aolao-laina lea o le mafutaga ma le Atua i o latou olaga i aso uma. E sili atu ona manana'o tagata i le mafutaga ma le Atua nai lo fa'amatalaga e uiga ia te Ia... O le talalelei e fia fa'alogo ma faa'talitali iai i latou, o le ta'u atu iai i Aso Sa ta'itasi, o le mamalu lea ma le pa'iaga o latou aiga. Latou te mana'omia le fa'amalosi'au atu iai, e uiga i le alofa matalasi e le fa'atuaoia o le Atua mo i latou. Ua fa'apea ona matuā suia ai le uiga o le fa'aeaina i le tofiga pelepitelo....'

Ou te manino ma malamala lelei i foliga fou ia, o le soifuaga i totonu o palisi. Ou te talosia foi, o tagata uma e faitau i la'u tusitusiga lenei, ole a ioe ma talitonu, e iai le mamalu ma le pa'iaga i totonu o tatou mafutaga o tagata Kerisiano – lea ou te mautinoa e aofia ai ma tagata lotu o isi ekalesia Kerisiano, e 'ese ai tatou o tagata Katoliko. Talu ai, ona e tatou te laugatasia i fualelei ole Papatisoga, o lona uiga e fa'apena foi ona galue i totonu o i latou le Agaga Paia. E faigata tele ona avea ma Katoliko Roma fa'amaoni se tasi i onapo nei, pe 'afai e le o ia o se Kerisiano ato'ato'a.

Ole fesili e tula'i mai, pe fa'apefea ona tatou fa'aaogā tatau lenei tulaga-mamalu e avea ma fa'avae maualā ma taolaola mo mafutaga o tagata Kerisiano? Muamua, e mana'omia lo tatou u'una'i ma fa'amalosi atu i tagata lotu, e tusa o meaalofo fa'a-le-agaga o lo'o ia i latou, ma le ono avea o i latou ma tagata tala'i, po o ni 'perofeta', e ala i lo latou soifuaga i aso ta'itasi. O lona lua, e mana'omia lo tatou fa'asaga atu i le lumana'i ma le lototele ma le fa'amoemoe ola. O lo tatou soifuaga i aso nei, e iai taimi e matua faigatā ai ona ofi atu iai galuega o le fa'atu-atua: ae peita'i, e sili atu ona malosi le alofa tunoa o le Atua. E mana'omia i tatou, ina fa'amalosi'au i o tatou tagata, ma faailoa iai le latou matafaioi, ina ia taumafai e 'fa'aliliuina Egelani atoa'. E lē o se taumafaiga ina ia fa'atoateleina tagata o le tatou ekalesia, pe o se tauvaga e iloa ai le ekalesia aupito malosi. Ae o se taumafaiga e faia i le loto mauualalo e auuina ma fesoasoani atu ai i ē ua se'e malie 'ese atu ma le ekalesia ma lo tatou fa'atuatuaga, atoa ma e o lo'o sa'ili'ili mo le upu moni ma le uiga o le soifuaga.

Fa'afouga ma le pa'iaga

O se tusitusiga lata mai nei a Katinali Daly, mo le *Mafutaga mo le Tofiga Pelepitelo*, na ia ta'ua manino ai:

'O le autū o se lauga e faia, ole taumafai lea e tata'i ma fa'aosofia finagalo ma manatu o tagata fa'alogologo i lo latou vafeagai ai ma Keriso Iesu. A fa'apu'upu'u, o se lauga lelei, e mafua mai i le mamalu ma le pa'iaga o le failauga ma lona fa'amoemoe ina ia utufia loto ma lagona o tagata fa'alogologo i le mana o le agaga pa'ia. O manatu ma lagona fa'aalia mo se fa'afouga i totonu o le Ekalesia, e masani ona aga'i i mata-faioi a vaega ma ona itutino ese'ese. O ia tulaga o se galuega tau'ave e fa'aauau pea, ae o le fa'afouga autū lava e mana'o-

mia e le Ekalesia, o le vala'au lea mo le pa'iaga o ona tagata uma, e aofia ai pelepitelo ma e mautofi o le lotu. A aunoa ma lea, e lē mafai ona fa'amanuiaina se fa'afouga e faia'.

O ia upu mo a'u lava ia, ua ta aofa'i uma iai le tulaga moni o le soifuaga i totonu o a tatou palisi i le taimi nei. Ua talafeagai le tu'ufa'atasia o nisi palisi tetele ma le tau faaitiitia o nisi o pule'aga ma ua maitauina ai se tulaga aga'i i luma o le 'fa'afouga o itutino' o le ekalesia ile tele o a tatou pule'aga. Ae tatau foi ona tatou fesili: ae fa'amata e tatau ona fai se tatou tala e uiga i le tau leai o nisi e ulufale i a'oa'oga mo tofiga ole lotu atoa ai ma le pa'u i lalo o le aofa'i o tagata e auai i sauniga lotu? Fa'amata ua mafai ona tatou atina'eina se faiga mautū e galulue felagolagoma'i ai le aufaigaluega ma tagata lotu? Ua mafai ea ona o tatou fetufaa'i i ni fuafuaga e fa'atuputeleina ai le galuega fa'a-misionare i totonu o palisi ta'itasi? I se isi fa'aupuga, o tatou amana'ia ea ma fa'ataua le pa'iaga ma le sao o tagata lotu?

Mo'omo'oga ma se miti

Ole malaga asiasi mai a Pope Falanisisi I egelani, o le a aofia ai se mea taua i le tala faasolopito: o le fa'aeaina lea o Ioane Katinali Newman (*John Cardinal Newman*). O lea sauniga ole a mafai ona avea ma fiafiaga mo so'o se tagata Kerisiano, ae lē na o tagata Katoliko. E telē se sao o le Ekalesia Agelikana (*Anglican Church*), i le soifuaga o Katinali Newman i lona tuputupua'e, ma sa vave ona ia silafia, o le lu'itau aupito mata'utia sa feagai ma le ekalesia i na onapo, o le fa'ato'ateleina lea o tagata ua lē talitonu ma fa'atuatua. O se vaega tele o lona soifuaga Katoliko, sa galue malosi ai e saga fa'alatele le taua o le sao ma le pa'iaga o tagata lotu aemaise o le latou matafaioi i le soifua i aso uma o le ekalesia ma ona tagata.

O le mafutaga a Epikopō Katoliko sa faia i le kolisi ole *Oscott College* ile tausaga e 1852, na faia ai lana lauga aupito ta'uta'ua e uiga i le 'Tau Totogo Lona Lua' (*The Second Spring*) – o le fa'afouga o le tatou Ekalesia sa ia manatu o se 'vavega o le alofa tunoa'. Fa'amata e mafai ona tatou toe moe miti mo se isi Tau Totogo i le tala faasolopito o le lotu i Egelani, ma se taimi ole a mafai ai e Kerisiano uma ona galulue fa'atasi i le toe aumaia o le Tala Lelei i o tatou laufanua? Peitai, e tatau ona muamua mai le pa'iaga, e le gata mo le au failotu ae fa'apea ai ma tagata lotu uma.

ENDS

FA'ATOMUAGA – O Fafine ma le Fa'aso'oina

O se va'aiga lelei i fafine ua ta'ua e le Feagaiga Tuai ma le Feagaiga Fou e ofoofogia, aemaise ona e le mafai ona fa'amatalaina i le malamalama'aga i le ituaiga o sosaiete i na onapo na soifua mai ai. Ioe, e 'ese mai lava i le tele o mea ua tatou iloa i lenā piriota o ana aganu'u ma le tāua.

O lo'o fa'aailoa lelei mai e evagelia le manatu lea. E ui o lo'o manino mai na tusia e ali'i, ae ua fa'aailoa mai e evagelia fafine e tāua toe mamana o le na fa'atasi ma Iesu a o malaga atu mai lona aiga i Kalilaia ma aga'i atu i lona maliu i Ierusalem. A o malaga atu Iesu i lona maliu ma le koluse, o le tele o ali'i ma fafine na tosiga atu i ai ona o vavega ma ana a'oa'oga. A o amata ona malamalama ile faitaulaga ma le puapuga o se vala'au autū, o le vala'auina e mulimuli atu ile Mesia fa'akoluseina, o le mata'u, o fa'anoanoaga, ma isi vaivaiga na mafua ai ona fa'ama'amulu isi ma o latou fa'atuatua, ma e to'atele na toe o 'ese mai ai. Ae o nai fafine fa'apea ni nai ali'i, sa lava onosa'i pea sa i ai lava se'ia o'o lava i le fa'akoluseina ma tua atu i le toetū. O latou ia sa mulimuli iā Iesu na avea ma misionare tala'i sa fa'aauauina le fa'asalalauina o le fe'au na tu'uina atu e Iesu iā i latou ina ua fai atu, "Ia outou o atu e fai nu'u uma lava ma so'o ma papatiso atu iā te i latou i le suafa o le Tamā, ma le Atali'i, ma le Agaga Pa'ia" (Mataio 28: 19).

Aemaise lava evagelia o lo'o aumaia se āta o le va'ai mamao i se va'aiga tutusa i ali'i ma fafine, faia i le fa'atua ole Atua, ua aumai o ni vaega o le malō o le Atua na sau Iesu e fa'avae mo tatou. Sa faia e Iesu vavega mo tinā o ni fanau teine mai nu'u 'ese fa'apea ta'ita'i lauiloa mo a latou atali'i. Sa a'oa'o Iesu i fa'ata'oto ma fa'aoga ai le a'afiaga o fafine i le paluina o le falaoa ma le saluina o otaota fa'apea le a'afiaga o ali'i sa pulea malō po'o latou sa tu'uina atu ni tupe e tele i 'au'auna ma le fa'atuatua a o malaga solo ile lalolagi. O a'oa'oga ma fa'ata'ita'iga a Iesu e le gata e a'afia ai ae o lo'o momoli maia tamali'i'aga mo fafine fa'apea ali'i.

O ali'i fa'atasi ai ma fafine o lo'o lu'itauina fo'i i aso nei e pei o aso o Iesu e lana fe'au, o lo'o vala'au mo se loto mata. O ali'i ma fafine ua vala'auina tutusa e Iesu ina ia liliu o latou olaga ina ia va'aia ai le 'ese'esega o suiga fou i le va o pisinisi e pei ona masani ai i se lalolagi ua tauva i le paoa, tupe ma le mamalu, ma tulaga fa'atūaina o le agalofa, amiotonu ma le filemū o measina ia o le malō o le Atua. I le manatu lea, o le fa'auigaina o evagelia o se gaioiga malosi ma o se moni ua tatala mai. Tatou te maua pea ma a'oa'o auala fou e mafai ona fa'aoga tusitusiga a evagelia i o tatou olaga. Aemaise pe a va'ai i le fa'anaunauga i le Tusi pa'ia i aso nei ma le auala fa'afaigofie e fa'amatala ai ona uiga, ua alagataua ona o tatou o le au fa'atuatua e talia lu'itau ia ma le vala'aulia e avea ma Tagata moni a le Atua.

O se Āta o le Fa'aso'oina

O le fia su'esu'e ma le fia iloa i fafine i evagelia ua sau ma le fa'aaliga e taofia ai: E le a'afia ni manatu po'o se sini autū fa'apea i le Feagaiga Fou. O a tatou fesili e lē o ni fesili na manatu i ai le 'au Tusi evagelia, ona o evagelia e le uiga i fafine ae o le fa'aso'oina. E tāua fo'i le manatuaina o tagata ua fa'amatalaina e evagelia ua sili atu le tāua i lo le tala'aga mo tatou; o latou e i ai lo latou tāua fa'afa'aailoga ma le fa'atelosia.

E leai se fa'amatalaga po'o se uiga fa'atauva'a o le

fa'aso'oina i evagelia. Ae o le fa'aso'oina ua fa'amatalaina i tulaga o le tino – ma le – toto i le fa'amatalaina o tala a evagelia, e i ai tagata ma uiga ua tatou a'oa'o mai ai. O le fefe ma le masalosalo, o le loto leaga i ta'ita'i, o le fenumi-a'i ma le lē malamalama o nisi sa mulimuli iā Iesu na mafua ai ona le mafai ona fa'aofi atoa mai le fe'au o le malō o le Atua ua taunu'u. A o latou sa le maua lava ni mea sa tatala atu o latou tagata, na fia 'a'ai mo le faimeatonu, ma sa fuafua e fa'amaloloina e Iesu i le tali atu ma le loto atoa pe a fesili mai, "Se a se mea e te mana'o i ai ou te faia iā te oe?" (Mareko 10: 51). Ma o fafine fa'apea ma ali'i ua tala-fetauai i ai le fa'amatalaina o so'o moni a Iesu, e pei ona molimauina e latou tali atu iā te ia ma lana fe'au.

E le mafai ona tatou fa'apea na fa'aogā ma le mautinoa e evagelia "fafine" o se sini autū, ae maoa'e le leai o se fafine na feiloa'i atu iā Iesu na alu e le'i suia pe le'i fa'aliliuina fo'i. O fafine ta'itasi uma na fa'apea sa feilaoa'i atu iā Iesu na tali ma le fa'atuatua ma na fa'aalia leleia.

O lo'o tu'uina maia e evagelia fa'amatalaga 'ese'ese o so'o a Iesu, ae 'au fa'atasi uma o se so'o o se tasi ua tosiga iā Iesu i se vala'au ma mulimuli iā te ia, ma e fa'aauau ona iloa mai i ana a'oa'oga e ui o lo'o latou aga'i atu i le faigamalaga i le koluse. Mo se fa'ata'ita'iga, fai mai Mareko sa tofia e Iesu "To'atinoagafulu ma le to'alua ina ia latou fa'atasi ma ia, ina ia 'au'auna atu fo'i i latou e tala'i le tala lelei." (Mareko 3: 14). O lo'o tusia e Luka Iesu o lo'o fai atu i ona so'o "o outou fo'i, ua outou tumau iā te a'u i 'ou tofotofoga" (Luka 22: 28) ma "o molimau o nei mea uma" – o lona maliu ma lona toetū (24: 48). Fai mai Ioane o so'o o latou ia na o mai iā Iesu, talitonu iā te ia, ma tumau fa'atasi ma ia (Ioane 1: 39; 15: 1).

O le tulaga o lo'o fa'amatala lelei mai ai fafine i evagelia e foliga ua alagataua mo le fa'aaliga o le malo o le Atua. E le pei o lalolagi nei o fafine ua masani ona a'afia i le leai o ni aiā tataua, le amana'iaina, ma le fa'agaloina, ae o le malō na fa'avaeina e Iesu o lo'o ofoina maia se tau ua 'ese mo latou. Ma o lenei 'ese'esega o se vaega o le fe'au o lo'o ia fa'atonuina ai i latou ua mulimuli iā te ia e a'oa'o i upu ma amioga.

I nisi o taimi o evagelia ua aumaia se āta e sāunoa toe leaga o so'o. Mo se fa'ata'ita'iga, o lo'o taufa'atatau mai Mareko e lē malamalama le 'au so'o iā Iesu ma na tuai ona talitonu (8: 17). E ui sa va'aia le tele o vavega, sa le mautonu ma masalosalo. Sa fesili le isi i le isi, "po o ai lava le-nei?" (Mareko 4: 41). Na o'o lava ina ua valo'ia e Iesu lona maliu i Ierusalem, ae sa finau le 'au so'o po o ai o latou e sili ma pe maua so latou tofi i le mamalu o Iesu (10: 35 – 45).

I isi o taimi ua fa'asoina mai e evagelia se mea mai le ta'uleleia o so'o i le agava'a i lo latou fa'atuatua ae ma'ale'ale, po'o le lē fa'amatalaina o manatu tigā e uiga i lo latou mafai ona malamalama pe mulimuli'a i a'oa'oga a Iesu, mo se fa'ata'ita'iga, pe na o atu ma le fa'aaloalo le 'au so'o iā Iesu le Faia'oga ma le fesili e uiga i le silisili o le malō o le lagi (Mataio 18: 1 – 5) i lo le finau iā i latou lava. Ona, i lo le fa'amata mai o le to'alua mai le To'asefululua, Iakopo ma Ioane, e naunau mo le mamalu ma le tulaga maua, ua liliu e Mataio le fesili ma fa'auiga i le fa'asoa i le mamalu a Iesu i lo la tinā (Mataio 20: 20 – 28). E

O FAFINE O EVAGELIA – O MISIONARE O LE ALOFA O LE ATUA

fa’apea fo’i ona lē aumaia e Luka nisi i’uvale mafatia a le ‘au so’o, e pei ona fai mai ai Mareko sa latou sōsōla mai ina ua avea e fitafita Iesu (14: 50). Mulimuli ane ina ua fasiotia Iesu, o evagelia uma e fa ua o gatasi i se manatu fa’apea, a o sōsōla le ‘au so’o ina ua saisi Iesu, o fafine sa fa’atasi ma ia mai Kalilaia na molimauina lona maliu, va’ai le mea na tanu ai o ia, ma o atu e fai fa’aleleia lona tino i le tu’ugamau. Sa tumau pea lo latou fa’atuatua na o’o lava ina maliu Iesu ma tu’u i le tu’ugamau. O nei fafine o ulua’i molimau i latou i le toetū... *(fa’aauau atu i lomiga i luma)*

SAGOLEGOLE

O LE TALA IA TULAU’ENA MA SINA

Sa ‘a’ave i itu e fa o Samoa le tala i le lalelei o le tama’ita’i o Sina. Ona o mai ai lea o aumoega o manaia ma ni a latou tauga pua’a, ma moa ma nisi mea lelei. Ua malaga mai fo’i o Tulifaiiave ma Tulau’ena, o le fanau o Taitofau ma Ogafau. Ua na o le tapuvae o le pua’a la la tauga. Ua iloa atu Sina ua ‘ese lava le manaia o Tulau’ena, ona ia fa’apea atu lea, “Ali’i e, sau ia ta te ‘aina lau tauga.” Ona ita tele ai lea o ali’i, ina ua talia e le tama’ita’i o le tapuvae, ae tu’u a latou moa lelei. Na o’o ina momoe tagata o i le fale, ona sosola ai lea o Sina ma Tulau’ena, Ona la nonofo ai lea. A o Tulifaiiave ua matau’a ia i lona aiga ua sa’ili se togafiti e oti ai Tulau’ena. Ua o’o i le tasi aso, ona fai atu lea o Tulifaiiave ia Tulau’ena, “Sau ia, se’i ta o e alo atu.” Ona alu ai lea o Tulau’ena ia Sina, ua fa’apea atu, “Sina, o le a ma o ma lo’u uso e alo atu; a ua ou iloa o le a fasia a’u e ia. O lenei la, a fa’apea e te va’ai atu o fati mai le galu sina, ua ou ola; a fa’apea o le galu toto e fati mai, ona e iloa ai lea ua ou oti.” Ona alu ai lea o le aloga atu, ae nofo Sina i le matafaga. Ua manuia le faiva, “ua tali goto le va’a i le tele o atu ua maua. Ona toe foi lea o le va’a. Ua lata le va’a i le a’au ona nofo lea o Tulifaiiave ma polo le atu, i le ua togi atu ia Tulau’ena ma le fa’apea atu, “Ina sapo ia.” Ona sapo lea e Tulau’ena. Ona togi sese lea o le tasi fasi atu, ua pa’u i le sami. Faiatu lea Tulifaiiave i lona uso, “Oso ifo loa i le fasi atu e ava’e.” Ona oso lea o Tulau’ena. Ua manu a’e le tua o le tama, ae tutu’i loa i le tao, ua oti ai. Ua nofo pea Sina ia i le matafaga. Ua va’ai atu ua oso mai le galu toto. Ona iloa lea e Sina ua oti lona to’alua. Ua alu loa le tama’ita’i e sa’ili. Ona tau atu lea i le lupe. Fesili atu Sina pe na te iloa lona to’alua. Tali mai le Lupe, “Ou te le iloa le pua’a po o fea o i ai.” Fai atu Sina, “Isa! O ona tau o lou agaleaga o le a ou tu’u la’u ma’a tatao lau’ie i lou isu.” E i ai ona puta nei o le isu o le lupe. Toe alu Sina. Tau atu i le manuma, toe fai fo’i lana fesili. Fai mai le manuma, “Na se’i alu ane le ali’i.” Tali atu Sina, “Ia, o ona tau o lou agalelei, avatu lo’u ‘ie sina e tu’u i lou fatafata.” Alu, alu Sina, tau atu i le Sega. Ona tagi atu lea o le tama’ita’i, “O le sega, o le manu a ali’i, se’i fai atu la’u

fesili: Pe na iinei lo’u fili?” Tali mai le sega, “Ina savali pea ia. A e tau atu ia Matamolali, ona e sasa ai lea o mata o le tama’ita’i i le si’usi’u launiu.” Fai atu lea Sina, “Ia, o ona tau o lou agalelei, avatu ia lo’u ‘ie ‘ula e tu’u i lou fatafata.”

Ona alu lea o Sina, ua tau atu i le tama’ita’i o Matamolali. Ona sasa lea o ona mata i le launiu. Ua tagi le tama’ita’i, a ua fesili Sina pe na te iloa lona to’alua. Tali Matamolali, “Tali atu iinei, so’u alu ou te sa’ilia.”

Ona alu lea o le tama’ita’i i le Pulotu, ua susu’e le vaiola. Ona alu ifo lea o le tafega o Manaia ma Taupou, ua i ai fo’i ma Tulau’ena. Tago atu loa le Tama’ita’i i le tama ma lelemo i le vaiola. Toe ola le tama... Ona la o a’e lea i le fale.

Ua la o’o atu, ua oso Sina, ua lafi. Ona fa’apea atu lea o Matamolali, “Funā e, se’i aumai se ‘ie, se’i lavalava ai si ali’i; e leaga, e susu lona ‘ie.” Ua togi mai le ‘ie o Sina. Ona tago Tulau’ena i ai, ona misi lea o lona gao. Fesili le tama’ita’i, “Po o le a le mea e misi ai lou gao?” Tali le tama, “Fa’apei lava lo ma ‘ie ma lo’u to’alua.” Toe fai atu le tama’ita’i ia Sina, “Aumai se selu e selu a’i le ulu o le ali’i.” Tago i ai Tulau’ena, toe misi fo’i lona gao, ma le fa’apea atu, “O le selu lenei e fa’apei o le ma selu ma lo’u to’alua.”

Ua fa’anoanoa ai lea o le ali’i i lona manatu ia Sina, ae fa’apea atu le tama’ita’i, “Sina, ina sau ia, a lailoa lenei ali’i i lona alofa ia te oe.” Ona oso mai lea o Sina, ua fusi lona tino ma feasogi ma fetagisi. Ona latou nonofo ai lea ma le tama’ita’i, ua fai ai lo latou aiga.



2019's Youth Camp was an amazing experience that brought many young people closer to God and closer to finding their true purpose in the world. The main values of this camp that wanted to be taught was 'Forgiveness and Trust'. This camp reminded our young community that God will always be there for you and there are always people willing to listen and help you with your problems in life. This camp had some great activities such as a Priest from Samoa coming in and preaching to us young people and also inspiring them to do better or little plays acting out Forgiveness and Trust. The one that made everyone feel closer to God was an activity that was held by one of the youth leaders which was about burning all your burdens that you've been carrying forever or you've just been carrying recently, but the main idea of this activity is to help you go in to 2019 knowing that there are no burdens on your shoulders. Meaning that the only thing stopping you from what you want to do is you. This camp has helped young people become a stronger youth group but most importantly a stronger individual with the help of God.

Pelenato Taaga-Anae—Autalavou Finagalo Paia Petone



FAITAUGA MO LE MASINA O FEPUARI 2019

ASO 3 FEPUARI ASO SA FA TAUSAGAI MASANI: FAITAUGA MUAMUA

Ieremia 1: 4 – 5, 17 – 19. Matua: Na a'u tofia 'oe e fai ma perofeta i nu'u.

Salamo: 71: 1 – 2 (tali), 3 – 4 (tali), 5 – 6 (tali), 15, 17 (tali). Tali: E ta'uta'u atu i lo'u gutu le amiotonu mai iā te oe.

Faitauga lona lua: 1 Korinito 12: 31; 13: 1 – 13. Matua: A o lenei, o tumau le fa'atua, ma le fa'amoemoe, ma le alofa; a o lē sili o na mea o le alofa lea.

Aleluia, Aleluia... 'Ou te fa'afetai iā te oe, lo'u Tamā e, le Ali'i o le lagi ma le lalolagi, ina ua e fa'aalia ia mea i tama valevale... Aleluia.

Evagelia: Luka 4: 21 – 30. Matua: Ua auina Iesu i isi tagata, fa'apei o Elia ma Elisaia, ae lē na o Iutaia.

Tofitofiga o le Upu:

E masani ona ave e le Ekalesia i maletile ni fa'asinomaga fa'apitoa i tulaga tau i le pa'iaga ma le fa'aaloalogia. O Tertullian i le seneturi lona lua sa tusi e uiga i toto masa'a a maletile o le fatu o le Ekalesia. O le manatu mo se tasi e finau i se mea ua talitonu atoatoa i ai ua o'o lava i le taliaina ai o le oti o se i'uga ua foliga mai e uiga 'ese lava, aemaise le va'ai a nisi o tatou o lo'o mala-malama i o tatou vaivaiga ma le vaivai o le fa'atua. O le tāua o lo'o fa'amanino mai e le telosia o le maliu maletile o le mea o lo'o tatou fa'amanatua ma patipatia fa'atasi ma maletile o lona tupito o mea na faia e le Atua i olaga o tagata vaivai. E pei ona fai mai ai upu tomua a Maletile, o gaioiga a le Atua e fa'aleleia ai o tatou vaivaiga, e fa'aleleia ai o tatou malosī'aga. O Ieremia o se perofeta e sili atu ona saogōfie i tulaga o ana tala ma lona tagata i lo perofeta uma. O se vaega ua ta'ua o 'kofesio' a Ieremia i lona lē malie ma le tauiviga i le avea ma perofeta ua mautinoa mai ai o mea o lo'o tutupu i le olaga o Ieremia o gaioiga ia a le Atua. Ma e ui na iloa lelei e Ieremia e o'o mai ai ma le puapuagā ma mafatiaga, ae sa iloa lelei lava e fa'atasi mai pea le Atua ma ia, ma e lē tu'u lafoa'ia o ia e le Atua. O lenei fa'amautinoa ma le iloa na mafai ai e Ieremia ona tau'ave ma talia ona tofotofoga ma puapuagā na o'o mai iā te ia. I le evagelia sa fa'apenā fo'i Iesu, sa lē fefe e feagai atu i isi e ui o lona uiga o le togiina o ia i se tofē tele. O le tele o Kerisiano i aso nei i le tele o atunu'u o lo'o feagai fo'i ma fa'amata'u fa'apenei ma lu'itau, ma e fa'amalosī pea le Atua i ali'i ma tama'ita'i e lavātia sauāga ina ia avea ma molimau (le isi uiga o le upu maletile) i lo latou fa'atua i le Atua. E o'o lava i taimi e lē lu'iteleina ai ma nu'u o lo'o vala'auina pea tama'ita'i ma ali'i ina ia avea ma molimau, e faia lea, e lē i so latou malosī, ae, e pei o Ieremia, i le mana a le Atua.

Metitasio mo le Aso Sa 3 Fepuari

"Maofa i upu alofa"

A'o a'oa'o atu Iesu, sa ia fetalai ma le pule. O ana a'oa'oga o upu lava a le tagata o le Upumoni. O le mafua'aga lea e tatau ai ona tatou fa'aaogaina ana upu fou. Sei o tatou tali ta'itasi i ai, i le tulaga latou te ulufia ai o tatou tagata, ma avea ai ma se vaega o i tatou, ma suia o tatou ala o mafaufauga, ma faia ni tagata "fou" mo i tatou. O le mea sili lea ona loloto, mauā'a, ma suiga mata'ina e tatau ai mo le tatou lalolagi i aso nei....

13

I taimi o popolega ma tiga na ou fafagaina a'u i le Afioga a le Atua, ua lagona le fa'atumulia o lo'u agaga. Ona ou iloa ai lea o lenei feso'otaiga ma Iesu e ala i lana Upu e lē taumateina i so'o se taimi, ma o lea e tatau ai ona fafagaina au i taimi uma. O lenei gaioiga ua fa'atumulia ai au i le olioli. O le mea moni o le Evagelia e lē gata o se tusi o fa'amafanafanaga, e sulufa'i i ai ma sa'ili i ai tali i taimi o mafatiaga. E i ai lava se mea e talanoa mai ai i so'o se feosia'iga; e maua ai tulafono fa'avae o le olaga. O upu a Iesu e lē gata ina faitauina ae o le a taumafaina e le agaga, ma o lea latou te faia ai i tatou i so'o se taimi ia tutusa ma ia.

Pe a tupu lenei mea, o mea e tutupu i aso taitasi (mafatiaga po'o le fiafia, mea masani po'o mea fa'apitoa) e leiloa ai tulaga o lona taua pe pa'u atu foi i le fa'agaloina, a'o le mea moni e taulia ua na'o Keriso lava, ua na'o ana Upu e mao'ona ma fa'aolaina ai i latou.

ASO 10 FEPUARI ASO SA LIMA TAUSAGA MASANI:

Faitauga muamua: Isaia 6: 1 – 8. Matua: O a'u lenei, inā auina atu a'u.

Salamo 138: 1 – 2 (tali), 3 (tali), 4 – 5 (tali), 7 – 8 (tali). Tali: Ou te fai pesega iā te oe i luma o agelu, le Ali'i e, ou te vivi'i atu i lou suafa.

Faitauga lona lua: 1 Korinito 15: 1 – 11. Matua: Po o a'u po i latou, e fa'apea ona matou tala'iina atu.

Aleluia, Aleluia... Ia manuia le tupu o lo'o maliu mai i le suafa ole Ali'i; o le manuia i le lagi, o le vi'iga fo'i i mea aupitoaluga... Aleluia.

Evagelia – Luka 5: 1 – 11. Matua: Ua latou tu'u mea uma, a e mulimuli atu iā te ia.

Tofitofiga o le Upu:

E ui e moni o le tagata e mafai ona o'o i ai le lototele nauā, o vituti, agaaloa ma le agalelei, e moni fo'i o le tele o tagata ua fa'ailogaina i le mailoa, i le lē atoatoa, vaivaiga ma le manatu fa'apito. E masani ona iloina lea i se lagona o le lē aogā ma le lē tāua pe a feagai atu i se mea ua lelei tele ma le pa'ia. O Isaia ma Peteru na tali tau i 'auala fa'apenei. O Isaia na feagai ma se fa'aaliga a le Atua, ma Peteru na fetaia'i ma moni o Keriso, i le ioeina o le 'avanoa' i le va o latou ma mea pa'ia uma. Mo Peteru ma Isaia o nei fetaia'iga e le'i mafua mai iā la'u – ae na sa'ili mai: e tāua tele lenā. O tatou uma e i ai taimi tatou te 'au ai i

le afio'aga o se silisili ma lē e lelei, ma tatou iloa ai le 'avanoa' i le va o tatou ma i latou. Ae 'ese pe afai o lo'o sa'ili mai tatou e se isi ma filifili e feiloa'i mai i lo latou lava manatu fa'atū – e masani o se fa'ailoga lenā o le fa'atūaina mo tatou lava. Na vala'auina Peteru ma Isaia e lē fa'apea ona e lelei pe silisili po'o le pa'ia, ae ona ua filifilia i le alofa, ma o lē ua filifilia i le alofa o le Atua e pa'ai lava. Ma na filifilia i la'ua o ni mea faigaluega, e tau'avea se galuega ua fa'amoemoe i lo la'ua agava'a – ia po'o le leai fo'i o se agava'a – ae ona ua alofagia. O tatou uma lava ua fa'alologologo i faitauga o lenei aso Sa, ua malamalama i o tatou fo'i vaivaiga ma le lē agava'a, ae o tatou fo'i, e pei o Isaia ma Peteru na filifilia, e le fa'apea ona o tatou vituti ma le loto tele, ae ona ua alofagia i tatou. O le ulua'i tali mai ua malamalamaina – ma ua alagataua – ae o le 'avanoa' e le o se mea e taofiofia ai ni a tatou gaioiga e fai, ae e pei o Isaia ma Peteru ua fa'amaopo mai ma talia o se faiga e 'auala mai ai le finagalo o le Atua e fa'aauai ai ana fuafuaga.

Metitasio mo le Aso Sa 10 Fepuari **"Aua e te fefe"**

Afai o le a fa'aauai pea ona fa'asaga tau mai fili ia te oe, atonu o lona uiga e le'i maua lava e ia le mea na sau ai e fa'ataunu'u, ana le o lea, ua ia taofi le fa'atiga ia te oe Afai e leai ni ou fa'afituli, tali fetaii lou fefe ma fesiligia oe lava. Ia e iloa pe o lenei mea ua tupu ona o se meaalofo saoloto a le Atua - o le mea lea e tatau ai ona e fa'afetai atu ia te ia ma lagona lou lē tatau ai, a le o lea foi, pe na tupu ona ua e masani i le tiapolo ma e fetu'tu'una'i – po'o le fea itu, o le taimi ua tatau ia te oe ona e mataala.

O Sagata Katerina o Siena, ina ua maua se asiasiga mai lona to'alua fa'alelagi i le taimi na osofaia ai o ia i le fanā'e o fa'aosoosoga o le tino. "Le Alii e," na ia vala'au atu ia te ia, "o fea sa e i ai a'o mafatia lo'u loto i le tele o fa'aosoosoga?" Na tali le Alii: "Sa ou i totonu o lou loto." Na ia fa'apea atu, "Ia fa'asaoina pea le moni e te fetalai mai ai, lo'u Alii e, ma le fa'aaloalo tele i lou mamalu, e mafai fa'apefea ona ou talitonu sa e nofo i totonu lo'u loto, a'o tumu i mafauauga palapala ma le tiapoloa? "Ae na tali le Alii: "O na mafauauga ma fa'aosoosoga: pe sa latou fa'afiafia i lou loto, pe na latou faia ni fa'anoanoaga? Pe na latou aumai ia te oe ni fa'alagona malie po'o ni lē fiafia." Na tali atu o ia, "Mata'utia le tigā, ma le lē fiafia tele." Ma ua tali mai le Alii: "O ai lena ua ia faia oe i lagona lē fiafia, pe afai o a'u lea na ou lafi i le moa o lou loto?"

ASO 17 FEPUARI ASO SA ONO TAUSAGA MASANI – FAITAUGA MUAMUA:

Ieremia 17: 5 – 8. Matua: Ia malaia le tagata e fa'atuatua i tagata. Amuia le tagata o lē fa'atuatua i le Ali'i.

Salamo – 1: 1 – 2 (tali), 3 (tali), 4, 6 (tali). Tali: Amuia le tagata o lē fa'atuatua i le Ali'i.

Faitauga lona lua: 1 Korinito 15: 12, 16 – 20. Matua: Afai ua lē toe fa'atuina Keriso, ua fa'aleaogā lo outou fa'atuatua.

Aleluia, Aleluia...Ua liu tagata le Upu, ua mau o ia ma i tatou. A o i latou uma o e na talia o ia, na ia avatu i ai o lea lava manuia ia avea i latou ma fanau a le Atua...Aleleluia.

Evagelia: Luka 6: 17, 20 – 26. Matua: Amuia outou o e matitiva. Oi Talofa iā te outou o e mauoa.

Tofitofiga o le Upu:

O lo'o i ai se mea e fa'amaniti tino mai le faitauga muamua i le asō fa'apea le Evagelia. Ua tatou masani i 'Fa'amanuiga' ma o lea la e mafanafana ai – ona auā e fai lava sina faigatā teisi ona malamalamaina. Ae o fa'amanuiga a Luka ma fa'anoanoaga tele ('fiafia' ma le 'auē') e maoa'e. O Luka o le Evagelia e foliga mai e vivi'i le mativa ona o latou e matitiva ma ua tu'ua'ia le 'au mau'oa ona e mau'oa. E le fa'atauva'a fa'apenā – ae – ma e tāua – ae o Luka e ala mai i lana Evagelia, e fa'atatau o le mativa ma le mana'o e sili ma lelei atu lona lelei ona o lo latou mana'o ma vaega fa'apea o le a sa'ili mo se togafitiga. O Ieremia, a talanoa mai iā i latou e fa'atuatuaina le 'tagata' – lona uiga le malosi fa'aletagata – ua ofoina maia se malamalama'aga atili: A o'o mai se lelei, e leai ni ona mata e iloa ai. O lona uiga o le va'aia o mea e pei ona iloa atu – o le fa'amoemoe iā ia lava o se ituaiga o tauaso lea. O le faigata mo latou e mau'oa/manuia/mamana/malosi ua masani i le fa'amoemoe iā i latou lava/ o latou 'oa/ lo latou mana i lo le Atua. O le lu'i la e faigofie: o a mea e fa'alagolago i ai le tagata ola – o latou lava po'o le na faia i latou? Afai o le fa'alagolago a le tagata ola o tatou lava, ona 'auē' lea mo tatou, ae afai 'ona o le Alo o le Tagata' ua tatou maua ai le fa'amoemoe, ona fa'apea lea ona olioli (fa'amanuaina). Ua ofoina mai e Paulo se lu'itau e tutusa – o fea e tu'u i ai fa'amoemoe a le tagata? Afai o lona lava ola, ua leiloa mea uma. Ae afai o tatou fa'amoemoe i le Ali'i Toetu, e leai se mea ua leiloa ma o mea uma ua maua.

Metitasio mo le Aso Sa 17 Fepuari **Olioli ma Fa'aosofia i le Olioli**

O le lafoa'i i le Atua o lona uiga o le tu'uina atu atoa o oe lava i le Atua, ia suia ia te ia. O le vaifofo mo oe lava o le fatu lea o le mea atoa, tatou te manaomia le fa'amalologa o oe lava e ala i le suiga, e pei o le areto ma le uaina i luga o le fata faitaulaga ua suia, ia Keriso.

I lenei tu'u lafoa'i, ou te talitonu, o le fofo mo mafatiaga o oe lava ia, o le mea moni lava lea i le tele o mafatiaga o le mafau. O le fofo mo vaivaiga e lē mafai ona tauaveina le avega mamafa o agasala a le lalolagi; o le fofo mo le

FAITAUGA MO LE MASINA O FEPUARI 2019

fefe lea e mafua ai le mamae o le taōfi a'o fa'afua mai lu'itau o le olaga, o le fofu mo vaivaiga lea e mafua ai ona tigaina le matagofie o le natura, o le fofu mo le pala'ai lea e mafua ai ona fai feagaiga ma mimini ai le fatu pe a tatafa mai lu'itau o le alofa.

Afai o le auala lenei e tu'u lafoa'i atoa ai se tagata paia, e moni o le a ia taliaina so'o se tulaga ua fa'atagaina e le Atua mo ia. Atonu o nisi taimi, ona o lona lava tofiga ma lona valaa'uina fa'apitoa, alu e feiloai ma fa'afeiloai nisi. O mea e pei o le mativa, mafatia, fa'anoanoa, sauāga – o a mea e te mana'o ai - ae e te lē taliaina i latou pe taliaina foi e i latou ona ua e manatu o ia mea e taua i lou olaga, ae talu ai, pe a fa'atusatusa i le olioli, le mana ma le matagofie o le Atua, toetoe a o se noa ia mea. O le a avea i latou e pei o laula'au e lelea i le matagi, o le matagi tele o le Agaga o le Alofa lea e tafi ai le lalolagi e pei o le afi mumu, ma tafu ia talalī i lona vi'iga. Mo le au paia, o le tu'u lafoa'i i le Atua o se maliega maoa'e o le loto, e pei o le oso i totonu o le afi o le Alofa fa'avavau, e mu ai i lona 'a'asa, e talia le susulu o lona malama, e siva ai i le sisiva o lona talalī.

Mo i tatou o se mea sili ona lilo, ae lē fa'aitiitia ai se vavega. O lona uiga e amata ona tatou *fiafia* i le olaga, ma fa'asolosolo malie atu ai ina maua le malosi o le agaga seia o'o ina mafai ona tatou fiafia i so'o se mea.

ASO 24 FEPUARI ASO SA FITU TAUSAGA MASANI: FAITAUGA MUAMUA:

Samuelu 26: 2, 7 – 9, 11 – 13, 22 – 23. Matua: Ua tu'uina mai oe e le Ali'i iā te a'u, a ua 'ou le mafai ona fa'ao'o lo'u lima iā te oe.

Salamo: 103: 1 – 2 (tali), 3 – 4 (tali), 8, 10 (tali), 12 – 13 (tali). Tali: E aloga mutimutivale ma alofa fua mai le Ali'i.

Faitauga lona lua: 1 Korinito 15: 45 – 49. Matua: Fa'apei ona foliga i tatou i le fa'a'ele'ele, e fa'apea lava i le fa'alelagi.

Aleluia, Aleluia...O au afioga ole agaga ia, o le ola fo'i ia; o iā te oe upu o le ola fa'avavau...Aleluia.

Evagelia: Luka 6: 27 – 38. Matua: Ia mutimutivale lo outou alofa, pei ona alofa mutimutivale lo outou Tamā.

Tofitofiga o le Upu:

Atonu o se mea tau i le aganu'u i aso nei, po'o ala o le tagata, ae ua faigofie ona ola a'i le olaga ua pei oni fa'afitauli e fo'ia. 'Afai e mafai ona ou feagai atu i lenei fa'afitauli, ona mautinoa lea o le a lelei mea uma. 'Ua foliga mai ua fa'apenā ona alu ai (se'ia tula'i mai le isi fa'afitauli). Ma ina ua sola 'ese mai Tavita mai iā Saulo, o se suiga fa'afuase'i ona liua mea na tutupu ma maua ai se avanoa ua ofoina mai ai ma se tali vave ma na mana'o Apisai ia Tavita ina ia fa'aoga le avanoa ua maua e fofō ai le 'fa'afitauli' a Saulo. Na te'ea e Tavita le fofō, ona sa ia maitauina o lo'o i ai se atatele atu o lo'o i ai. E le o le fesili pe fa'apefea ona feagai atu ma mea ua tula'i mai, ae pe fa'apefea i se tagata ona ola ai ma se mafutaga ma le Atua ma mea tau i le Atua. O Saulo na fa'au'uina e le Ali'i ma o le a afaina ai o ia o le a fa'apea ona fa'aletonu le la va ma le Ali'i.

O le a'oa'oga maoa'e a Luka i le Evagelia o le asō (le Lauga i luga o le Laulelei – e tutusa ma le Lauga a Mataio i luga o le Mauga) ua fa'aailoa mai ia se ata tele i se aula a fa'aaloalo. O a'oa'oga ua aumai e Iesu e fa'atauana toe lu'itau tele i auala o lo'o fa'amoemoe mo tagata e tatou ona ola ai: 'Alofa atu ia i latou e ita mai', 'a'ua ne'i toe fa'afo'i maia au 'oa mai le tagata na gaoi mai ia oe.' Na faia e Iesu le mean a faia e Tavita ma fa'alaua'itele – afai o Saulo o le na fa'au'uina e le Ali'i – e fa'apena fo'i tagata uma. Ua fa'apelepeleina ma alofagia e le Atua, ma filifilia e pei o Saulo. Ina ua vala'aulia e Iesu ona so'o ina ia alofa atu e pei ona alofaina e le Tamā o lo'o ia talosagaina i latou ina ia e va'ai i le ata laua'itele ma ola ai – va'ai e pei o le Atuama ola ai. O lona uiga ia 'alo 'ese i le va'ai na o le taimi nei po'o le ola i se olaga ua na o ni fa'afitauli e mana'omia le fa'aleleiga. Ua vala'uliai latou e fa'alogoa va'ai i le olaga o se mea atoa, o mea uma o se vaega o se atoaga – ma e a'afiaai le ola ua tatou ta'u o le ola e fa'avavau – o lo'o i ai meaalofo moo e: o se fua atoa, ua 'o'omi i lalo...ma ua oso i lalo.

I se isi ituo le mea ua vala'auina atu i ai tatou, i upu a Paulo i le faitauga lona lua, e peio se Atamu fou. O tatou mai le 'ele'ele, ae o le vala'ulia ina ia avea o le Atamu lona lua – fa'atusa i le tagata mai le lagi – na avea'agaalofo e pei o le Tamā agaalofo.'

Metitasio mo le Aso Sa 24 Fepuari Alolofa i le Alofa o le Tama

I so'o se tulimanu o magāala, ua masūa mai ai tama'i vevesi, e pei lava ona i ai i luga o fetaulaiga ala o le lalolagi o lo'o i ai pea taua tetele. I taimi uma e suia ai o tatou olaga e mafai ona tatou fa'aailoa le filemu pe si'i se taua - ma ua lamatia ai i tatou i mala lelei-fuafua i le faia o taua.

E mafua lenei mea ona o a tatou faigauo totino ua olo fa'asagatau mai ia i tatou lava, e masani ona latou fa'atupu ai le ita. O le mea lea, uso e, o lo'o i ai 'oa a lo tatou tamā ia pulea ma fa'asoaina atu.

O le mafua'aga lea e na'o fanau lava a le Atua e fa'atupuina le filemu moni. Mo i latou nei, ua avea le lalolagi ma fale e fitoitonu i lo latou Tama i le lagi. O mea uma i luga o le fogaelele o ana ia, e o'o a i le elele lava ia. Ioe, o le mea moni o le lalolagi o le fale o lo latou Tama. E leai se vaega o ia mea latou te inoino i ai - e leai se konetinetā, leai se motu tusa lava po'o le laititi, leai se malo, leai se tuāmaota; latou te le fiato'ilalo i se mea - leai se fa'atafāfā, leai se ala savali, leai se ofisa, leai se faleoloa, leai se uafu, leai se auala nofoaafi

Taulogologo

Latou te faia a latou pisinisi e fa'atūina ai i le lalolagi le agaga fa'aleaiga. I taeao taitasi a'o latou agai atu i le auala latou te maofa i lenei avanoa fou e iloa ai e o latou mata fa'aletino ia uso uma na latou fa'atoā feiloai i ai i le loloto o le fa'atuatua. E lē mafai ona latou vavae'eseina mai ia i latou lava pe tausia o ni tagataese; e o'o lava i le aiā tataui se nofoa i totonu o le pasi ua taufesili lava...

O uigailo tū'ese fa'aaga-feso'ota'i ua fa'aitiitia i le va'ai. O vaega fa'avae i le iloiloga o tagataola ua amata ona malepe. E itiiti ni fe'ese'eseaiga e mafai ai ona va'aia pe a fa'atusatusa i le matūpalapala e tutusa ai atali'i ma afafine o le Atua; ma o nei ese'esega ua matilatila e pei lava o se filo se tasi ua su'iina i luga o se ie pa'epa'e. E pei ona i ai i luga o le fa'ata tatou te iloa ai mea uma ua nimo e lē taua i le tino - o lavalava, o maso, e tusa o le sulumalama o le suafa o le Alo o le Atua o mea uma e mou atu se'i vaganā ai lo tatou tupu'aga paia.

FA'ASOLOGA MISASA MO FEPUARI - 2019

		Misasa Amata Matagaluega	
1st. Sunday	2.00pm	Petone Church	Cardinal John Dew
3 Fepuari 2019			
2nd. Sunday			
10 Fepuari 2019	11.00	Wainuiomata	
	11.00am	Naenae	Patele Maleko
3rd. Sunday			
17 Fepuari 2019	11.00am	Newtown	
	11.00am	Lower Hutt	Patele Anitele'a
4th. Sunday			
24th. Fepuari	11	Stokes Valley	

KALENA MO FEPUARI – 2019

Aso Faraile Aso 1st. & 2nd. Fepuari – Reflection A'oga aso Sa

Aso 3rd. Fepuari – Lotu Amata Matagaluega

Aso 8th. Fepuari – Fonotaga Matagaluega nofoaga Masani.

Aso 14th Fepuari – Misasa o le Valetine – St. Joseph's Church, Mt. Victoria at 7pm.

O lo'o i ai ni faiga semina po'o ni a'oa'oga ua fa'atulagaina mo le tatou Pule'aga Fa'aakiepioko e uiga i le mataupu o le "Puiipua po'o le Saogalemū" o tagata. O lenei fa'aosofiaga o le finagalo a le Katinale ina ia maua se fesoasoani mo latou o lo'o ofoina o latou taimi mo fanau laiti (a'oga Aso Sa), Tupulaga Talavou ma tagata matutua ua vaivai. O le ulua'i semina e faia lea i Sagata Ana i Newtown aso 28 Fepuari 2019, ma e talosagaina ai le tatou Matagaluega ia taumafai e 'aia atu i ia semina pe a o'o mai le fa'asologa i le tou Palisi. O le a taulogologo atu pea nei aso, taimi ma nofoaga e faia ai.

Fa'afetai